




ULSTEIN KYRKJE  
*Saman på ferda*



DEN NORSKE KYRKJA  
Ulstein sokn



Ingrid Nerhoel som Berte Kanutte Aarflot, og Ole Sande som Ezekiel i kyrkjebakkespelet. Foto: Ole-Ottar Høgstavoll / Vikebladet Vestposten

# ÅRSMELDING 2023

Godkjent av Ulstein sokneråd i sak 2024/8

*Meir himmel på jorda*



Saman på ferda  
Foto: Cecilie Hatløy

---

Den Norske Kyrkje  
Ulstein sokn  
Kyrjekontoret  
Sjøgata 61 (Pb. 143)  
6067 Ulsteinvik  
Tlf: 700 17 680

E-post:  
Facebook:  
Nettside Ulstein sokn:  
Ulstein nye kyrkje:

[post.ulstein@kyrkja.no](mailto:post.ulstein@kyrkja.no)  
Ulstein kyrkje  
[www.ulsteinkyrkje.no](http://www.ulsteinkyrkje.no)  
[www.ulsteinnyekyrkje.no](http://www.ulsteinnyekyrkje.no)

# INNHALD

Solskinshistorier i Ulstein kyrkje frå 2023 .....	s. 4
Diakoni i Ulstein kyrkje .....	s. 8
Prestetenesta i Ulstein kyrkje .....	s. 14
Undervisning, barn og ungdom .....	s. 19
Kyrkjemusikk i Ulstein kyrkje .....	s. 24
Samarbeid med barne- og ungdomsorganisasjonane .....	s. 28
Ulstein sokneråd .....	s. 30
Staben i Ulstein kyrkje .....	s. 34
Bygg og anlegg .....	s. 36
Statistikk .....	s. 39
Økonomi .....	s. 42
Informasjon og kontakt .....	s. 45
Sluttord .....	s. 47

# SOLSKINSHISTORIER I ULSTEIN KYRKJE FRÅ 2023



## Valentinsdag 2023

Valentindagsvigsel vart ei gledenleg overrasking då heile sju par valde å gifte seg denne dagen! Nokon i joggesko og jeans, andre i dress og kjole - nokon hemmeleg, andre med familie og vener. Alle fekk fint pynta kyrkje, solosong og ei vakker ramme rundt det å gje kvarandre løfter om kjærleik og truskap.

## NRK-gudstenester

At NRK har valt å sende sine gudstenester på radio og TV frå Ulstein som einaste kyrkjelyd frå Møre, er både flott og spennande! Å vere ein av seks kyrkjelydar er ei flott anerkjenning av arbeidet og viktig reklame for det fine lokalsamfunnet vårt. Vi veit at ei aktiv og god folkekyrkje betyr noko for folk når dei vurderer å busetje seg.



Skjermdump frå NRK TV.



## Jubilantfesten

Denne gjekk av stabelen 26. oktober, som den andre i sitt slag for alle som fylde høvesvis 75, 80, 85, 90, 95 og 100 år i 2023. Det var ein kjempesuksess med stor oppslutnad og med utruleg gode tilbakemeldingar. To timar med prat, musikkinnslag, lokalhistorie og bursdagskake i lag med gamle kjende. Også her er gjennomgangstenen at det er godt å verte hugsa på. Tusen takk til Sanitetslaga i Ulstein for økonomisk støtte.

## Leiarhelg med ungdomar

Vi er glade for alle ungdommar som er med som leiarar i kyrkja vår. Denne hausten hadde vi leiarhelg på Speiderstua på Ørskogfjellet for fyrste gong. Vi starta i Ålesund med Escaperoom, rebus og pizza, før vi drog til Speiderstua for taco, underholdningskveld og jakting på nordlys. Det vart ei kjekk helg som vi håpar på å gjere til ein tradisjon. For oss er det viktig å vise at vi set pris på ungdomsleiarane!



## Michelle - vår nye kantor!

2023 var året der vi endelig fekk ny kantor på plass, etter å ha lyst ut stillinga fire gongar. Førre gong det vart tilsett ny kantor i Ulstein var i 1995!

Michelle har arbeidd som organist i Sverige og har god erfaring med kyrkjemusikk, barnekor og orgelundervisning. Å flytte frå millionbyen Stockholm til vesle Ulsteinvik var ein stor overgang for Michelle, så vi er takksame for at ho kjenner seg godt tatt i mot. Takk for at du reddar kyrkjemusikken, Michelle!

Les sak frå NRK:  
"Michelle frå Sverige reddar kyrkjemusikken"



Foto: Arne Flatin / NRK


### 8.mars-gudstenesta

Rundt 70 personar var samla i kapellet på Sunnmøre Folkehøgskule. Den ukrainske sanggruppa "Barvii" deltok, og bønner frå ulike land vart lagt fram. Tre kvinner fortalte om kvinnene sin posisjon og status i tre ulike land. Mellom anna ei sterk beretning frå ukrainske Anna, som fortalde om si flukt frå krigen saman med si fem år gamle datter. Ei fin stund der ein kjenner på stoltheita og styrken det er å stå saman i eit kvinnefelleskap. Det ukrainske miljøet har blitt ein del av kyrkja med aktiv deltaking på mange måtar.



### Kunstig intelligens

Kunstig intelligens vil i større grad prege liva våre framover, og vi var stolte av å vere den fyrste som hadde temakveld om dette både lokalt og i kyrkja nasjonalt. Kvelden hadde godt oppmøte der vi fekk kompetent innføring og refleksjon knytt til fordelar og etiske utfordringar knytt til bruk av KI, ved Berge Myrene og Sveinar Kleive.



### Kyrkjeval 2023

Det blei gjennomført kyrkjeval 11.09.23 for ein ny fireårsperiode. Også denne gongen fekk vi eit engasjert og klokt sokneråd. Truleg er det nye soknerådet i landstoppen over lavast gjennomsnittsalder, og vi er takksame for alle som ynskjer å bidra saman på ferda!



### Aktivitetkveld med KRIK og Ten Sing

Ein sommarleg kveld i juni vart alle 7.-klassingar invitert til eit felles opplegg med KRIK og Ten Sing, der desse fekk vise delar av sine tilbod. Over femti ungdommar fekk prøve seg på korsong, band, konkurransar og ubegrensa mengder med gratis pizza. Les meir under kapittelet om barn og unge.



## Kyrkjebakkenspelet - Eg spelte på fløyte

Urframsynining av kyrkjebakkespelet, "Eg spelte på fløyte", gjekk av stabelen 19.mars på Sjøborg Kulturhus. Med kantor Ståle Helvig i spissen og ein erfaren og kreativ regissør i Dagfinn Olav Bye har Ulstein sokn jobba i mange år med dette prosjektet. Kyrkjebakkespelet tok oss tilbake til kyrkjebakken på Ulstein gamle kyrkjestad på midten av 1800-talet, som på den tida var ein samlingsstad for bygdefolket for både glede, gapestokk og siste nytt - som spelet viste. Med lokale utøvarar på scene, i kor, i band, og på begge sider av kamera markerte Ulstein sokn seg sterkt i lokalt kulturliv.

Les meir om spelet under kapittelet om kyrkjemusikk.



Svært mange var involverte i Kyrkjebakkespelet.

Foto: Ole-Ottar Høgstavoll / Vikebladet Vestposten



Stig Grimstad i rolla som fiskaren frå Flø.  
Foto: Ole-Ottar Høgstavoll / Vikebladet Vestposten

Les sak frå Vikebladet Vestposten:  
"Framifrå kyrkjebakkespel"



# DIAKONI I ULSTEIN KYRKJE

*Den norske kyrkje definerer diakoni slik:*

*"Diakoni er kyrkja si omsorgsteneste. Den er evangeliet i handling og skal uttrykkast gjennom nestekjærleik, inkluderande fellesskap, vern om skaparverket og kamp for rettferd."*

*Diakoni er lettare gjort enn sagt... og det er gjennom «å gjere og vere» for våre medmenneske at ein kan nå inn til hjarta. Diakoni er både det som gjerast av diakon og diakoniarbeidarar, men også ein dimensjon ved det å vere kyrkje. Alt arbeid som gjerast i kyrkjelyden, frå å ha ansvar for kyrkjekaffi, bake kaker, eller invitere med ein ven på gudsteneste eller på torsdagskveld på Fredheim er diakoni i praksis.*

I 2023 kunne vi fullt ut vere saman igjen, og det har vore godt. Likevel har året med restriksjonar gjort noko med oss, med at vi må tenke nytt og vere kreative i korleis vi kan nå ut til fleire. Diakonitenesta skal ta pulsen og føle kvar det trengs mest, og det må vere rom for at ein skal kunne snu seg rundt "på hælen". Denne fleksibiliteten gir oss som arbeider med diakoni eit høve til, men også eit ansvar for å følge med i tida. Med dette krevst det å vere synlege der folk ferdast, at vi kan invitere inn menneske i våre fellesskap - og med det bygge ned dørstokkar og opne opp dører.

## Strikkekafe

Kvar måndag kveld møtes vi for sosialt samvær med og utan strikk. Dette har blitt veldig populært, og vi er på det jamne 20-25 personar. Nokre lokale, og nokre nye tilflyttarar. Dette kom i utgangspunktet i gong etter utbrotet av krigen i Ukraina og at vi ville strikke og sende varme klede til både soldatar og sivile. Vi har sendt kassevis med strikk, som har føltes godt å få gjere. Det er så lett å bli mismodige når vi ser alt det vonde som skjer rundt oss, men det å føle på ein uro som fører til handling er ein veldig bra ting. Om vi ikkje får hjelpe alle, så kan vi i alle fall hjelpe nokon.

Mange bidreg med tråd og litt å bite i. Dette er diakoni i praksis. I tillegg får vi ei stund med prat, latter og norsktraining. Det er ei god pause frå alt anna for veldig mange.







### Kyrkjekaffi

Dette har vi prøvd så langt som råd å ha etter kvar gudsteneste. Vi har sett at ein variasjon med kyrkjekaffi på Fredheim, enklare kyrkjekaffi i kyrkja og matpakketurar har fungert veldig fint. Vi har også sett kor viktig kyrkjekaffien er for integrering og som ein sosial møteplass. Det har vore veldig god oppslutnad, særleg på Fredheim. Vi har sett at flyktingane har søkt hit, og har funne sin plass i felleskapet i kyrkjelyden vår. Det å spørre om hjelp til å fylle frysaren med kaffimat har vore ein veldig fin og god ting. Samstundes som det avlastar dei som tek på seg å hjelpe til med kyrkjekaffien får ein også fleire med på laget.

### Andakter på Alvehaugen, Bygdestova og Holsakeren

Dette året har vi auka talet på andakter på institusjonane. Frå å ha andakt annankvar veke i Holsakerdalen 20, har vi no andakter kvar veke både på sjukeheimen, bygdestova og Holskerdalen 20. Dei set verkeleg pris på at vi kjem.



### Kyrkja på senteret

Ei fantastisk positiv leiding på Blåhuset let oss få låne lokalet så lenge det er ledig, og opningstida har vore onsdagar frå kl 11-15. Vi har framleis jamne besøkstal. Kyrkja på senteret har vist seg å vere ein fin møtestad både for dei som ynskjer ein kaffikopp og ei sosial stund ilag med fleire, men også for dei som treng samatar utanom, til dømes sjelesorg. Det kjem om lag fem personar i gjennomsnitt kvar onsdag gjennom året. Tilbakemeldingane som har kome er at det er fint at vi møter folk der dei er, og at terskelen er låg for å stikke innom. Det er hyggeleg å høyre.

### Besøksteneste

Heimebesøk, telefonsamtale og vandresamtale er ein viktig del av jobben. Ein ser at behovet for fleksibilitet i høve arbeidstid er fint for brukarane av diakonitenesta.

### Internasjonal kvinnegruppe

Vi har samlingar ein gong i månaden. Frå å ha møter i heimane, har vi frå hausten 2023 flytta samlingane til kyrkja. Vi har heldt fram med same forma på møta med sang, andakt, matykt, lystenning og bøn. Erfaringa med å flytte samlingane til kyrkja er gode. Vi får med oss ein ekstra dimensjon ved å ha det akkurat her, og det er fint å kunne bruke kyrkjebygget også utanom gudstenestene.



### Sjelesorgssamtalar og vandresamtalar

Etter eit dødsfall får alle pårørande tilbod om heimebesøk eller samtale på telefon. I enkelte tilfelle har samtalanane gått utover heile året. Det er eit tilbod mange set pris på. Nokre av tilbakemeldingane vi har fått er at det er godt å verte hugsa på. Om pårørande ikkje bur her, så er ei melding eller ein telefonsamtale viktig å få. Vi er på besøk heime hjå folk, og nokre kjem til samtale på kontoret. Av og til har vi samtalar ute, såkalla «vandresamtalar». Mange kjenner at samtalen kan flyte lettare når ein samtidig får vere ute i naturen.

## Allehelgenshelga

Også i år laga vi til minne- og håp svandring på kyrkjegarden utanfor kyrkja. Med hjelp frå lokale kunstnarar vart kyrkja pynta ekstra vakkert, og blomar og levande lys sette stemninga rundt denne helga. Også i år laga vi til eit minnetre der ein kunne henge opp raude hjarte med namna til dei ein ville minnast. Minnesamlinga var også i år sett til laurdag kl 17.00. Tilbakemeldingane som har kome viser at denne minnesamlinga er særskild viktig for dei sørgande, som ein stad der dei får vere saman i sorga.



## Ettermiddagskaffi med song og gode ord

Dette starta opp i 2021 med Ingrid Nerhoel og Mari Ann Vattøy, først og fremst som eit tilbod til dei som bur i omsorgsboligar på Sjøside. Dette vart starta med ei oppmoding frå omsorgsetaten i kommunen. Vi hadde fem samlingar i 2023 - kjærkome for alle involverte. Vi vonar og ber om at vi kan få halde fram i 2024.



## Gudsteneste med universell utforming

I juni og i november vart det gjennomført gudsteneste med universell utforming. Det blei sendt ut invitasjonar også til institusjonar utanfor vår kommunegrense. Dei frammøtte hadde ei herlig stund med song og musikkglede leia av Fjøresteinane, som både leia allsong og hadde eigne innslag. Det vart fine samlingar med rundt 60 frammøtte.

## Kyrkjelydsfest på Kjeldsund søndag 11.juni

Dette vart arrangert i lag med KRIK og søndagskolen. Det vart ein fin kyrkjelydsfest sjølv om det i år var veldig mykje som skjedde same helga, og mange av dei same personane var involverte på fleire arrangement. Ulsteinmessa og ekstraframsyning av kyrkjespelet skjedde parallelt. Dette lærer vi av, og prøvar å unngå neste gong.

Også i år hadde vi ordna med skyss for våre nye innbyggjarar. Stor takk til alle frivillige som tok med seg fleire i bilane sine. Vi har fått mange fine tilbakemeldingar i etterkant. Gode opplevingar gir pusterom frå vonde tankar.



## Hjartevarmeaksjonen

I år vart det pakka 175 matkasser, og det er meir enn nokon gong. Totalt 412 personar, derav 284 vaksne og 129 barn fekk stor glede av desse. Det har nok vore ei stram tid for mange, som også visast på at det var lagt mindre varer i handlevognene på butikkane enn før. Vi fekk også inn mindre pengar på vipps, men takka vere rause tilskot frå mellom andre Sparebankstiftinga og Møre og Romsdal fylkeskommune kom vi i mål i år også.

Denne aksjonen er eit samarbeid mellom Frivilligsentralen, Nyekyrkjekarane, Sørøyane Røde kors og Ulstein Sokn. Mari Ann Vattøy er representant frå soknet. Vi vil berre få takke for all hjelp vi har fått! Utan hjelp frå dei frivillige, hadde vi ikkje klart å gjennomføre ein slik aksjon.



Hjartevarmeaksjonen 2023

## Saman som kyrkje i heile verda

Ulstein sokn har misjonsavtale med NMS. Fokusområdet vårt er Midtausten, og vi har kollekt fleire gongar i året til prosjekta. Her er det særskilt arbeidet med TV-stasjonen SAT7 som sender kristne program for både born og vaksne. Prosjektet støttar også kurs- og kompetansesenteret Anafora og ein kristen bokhandel i Kairo.

Den Norske Kyrkja og misjonsorganisasjonane har ei aksjonsperiode frå Kristi Himmelfart til St.Hans - "Saman som kyrkje i heile verda". Ei særskild gudsteneste på våren hadde vi tombola under kyrjekaffien. Vi hadde og misjonstombola under kyrkjelydsfesten på Kjeldsund. På hausten inviterte vi May Lisbeth Hovlid Aurdal frå misjons-selskapet til å halde preike under gudstenesta, og etterpå var det aktivitetar for barn med mellom anna ansiktsmaling i regi av ukrainske kunstnarar.



Saman som kyrkje i heile verda - misjonsprosjektet i soknet.

## Opa julefeiring 2023

I samarbeid med Kjeldsund leirstad ved Trygve Danbolt Øygard og Herøy sokn ved diakon Ragnhild Danbolt Øygard, har Ulstein sokn ved diakoniarbeidar Mari Ann Vattøy og diakon Karine Sæter også i år arrangert opa julefeiring på Kjeldsund julaftan frå kl. 17-21. Dette er eit gratis arrangement og eit alternativ for dei som ynskjer å ha nokon å feire julaftan saman med. Det vart også i år servert julemiddag og kakebord, og det var gang kring juletreet. For borna var det gåver og aktivitetar.

Både små og store var samla på eit koseleg julepynta Kjeldsund, med heile 65 påmelde. Tusen takk for hjelpa til alle frivillige, og til Link for transport med buss. Om fleire vil hjelpe på sjølve arrangementet neste år set vi stor pris på det. Stor takk til Ulsteinvik Sanitetsforeining, Sparebank 1 og Frivilligsentralen for rause gåver!

## Nye tiltak

Eit nytt tilbod av året er sorgstøttesamlingar. Tanken er at ein har undervisning og samtalar kring temaet sorg. Kanskje er det lettare for folk å møtast ein stad der fleire i same situasjon er saman, der ein nødvendigvis ikkje treng å prate så mykje sjølv. Vi hadde ei samling i november med femten frammøtte. Ei ny samling er planlagt for mars 2024.

## Diakoniutvalet

Utvalet har også dette året bestått av Cecilie Frantsen Skeide frå soknerådet og diakonvikar Mari Ann Vattøy. Vi har jobba godt i lag. Sidan to personar i utvalet gjekk ut før soknerådsperioda var over, har vi valt å halde fram utan andre, fordi vi har sett at det har vore enklare å knytte til seg folk til ulike prosjekt enn å få nokon inn fast. Det har vist seg å fungere godt, men det krevst sjølvsagt at vi har jobba godt i lag.

Mari Ann Vattøy har jobba 100% heile 2023, og Karine Sæter begynte på igjen 50% som diakon og 20% som ansvarleg for Byggekllossen hausten 2023. Samarbeidet på tvers i staben fungerer fint. Vi har også i år fått hjelpe til enkelte trusopplæringsprosjekt, som Kode B, Tårnagent og konfirmantleir både vinter og sommar. Mari Ann Vattøy har også fått avlaste prestane med enkelte oppgåver hausten 2023.



Foto: Jorulf Myrene / Vikebladet Vestposten



Kveldsmat for flyktningar



Vaffelsteiking på Ulsteinmessa 2023

## Byggeklossen open barnehage

Hausten 2022 fekk Byggeklossen open barnehage seg eit oppsving under leiing av Tomine Sævik Voldsund og Karine Sæter, med god hjelp frå Ruben Voldsund til å lage ny logo og promoteringsmateriell. Med dette som fundament har 2023 også halde fram med gode oppmøtetal. Det er i gjennomsnitt litt over 13 born og eit tilsvarande antal vaksne kvar gong. Karine Sæter har tatt over ansvar fast på Byggeklossen. Vi byrja med å ha babysong kvar veke, framleis med Kari Aske Osnes.

Det er stor utskifting i kva barnegruppe som er på Byggeklossen. Ein sesong er det flest eittåringar, ein annan sesong er det litt eldre barn og så kan det plutseleg vere ein sesong med mange babyar. Det er også fleire frå asylmottaket som brukar tilbodet, og dei seier at det betyr mykje for dei. Grunnane for utskifting av kven som er der er oftast barnehagestart, overgang til at pappa er heime med barnet eller flytting til ny kommune, særleg for flyktingar. Vi ser heldigvis at fleire og fleire fedre også tek turen til open barnehage, og det er vi veldig glade for.

Opningstider for byggeklossen open barnehage i 2023 har vore tysdagar frå kl 9-15.

Sommaren 2023 takka vi av vår gode frivillige Mirzeta etter mange år i teneste. Tusen takk for truskapen din og alt du har bidrege med!

# BYGGEKLOSSEN

OPEN BARNEHAGE

Ny logo gjer promoteringsmateriell lettare å kjenne att.



Mirzeta Mulac



Måling er populært for store og små på Byggeklossen

# PRESTETENESTA I ULSTEIN KYRKJE

*Prestetenesta har sitt fundament i kyrkja si tenesteordning der presten på vegne av kyrkjelyden er utpeika til å ha eit særskilt oppdrag i ansvaret med å forkynne og forvalte sakramenta, drive sjelesorg, undervise og gjennom samhandling med kyrkjelege tilsette og frivillige bidra til å vekke og nære det kristne livet. Tenesta står under biskopen sitt tilsyn gjennom prosten, slik at den vert driven forsvarleg etter gjeldande regelverk. Gudstenester, kyrkjelege handlingar, andakter, soknebod, sjelesorg og undervisning er våre oppgåver.*

Gudstenesta er kyrkja si hovudsamling og sentrum som gjev næring og styrke til å stå i liv, arbeid og teneste. Prestane administrer eit stort frivilligkorps i lag med kantor og klokkar, og mange hundre medverkar som frivillige gjennom året. Gudstenesta er snart den einaste intergenerasjonelle møtestaden der vi på tvers av skilnader i alder, sosial status, meiningar og erfaringar kan samlast likeverdig til eit møte med Gud, kvarandre og oss sjølve. Slike møter er transformerande, dei styrkar trua og framkallar oss som menneske. Bibelen sine forteljingar, fellesskap og sakrament utfordrar, oppmuntrar og utrustar. Individualismen freistar oss til å tenke at trusliv er noko vi gjer privat og åleine. Dette har inga rot, korkje i Bibelen eller kyrkja sin tradisjon. Tru treng fellesskap for å ikkje fare på ville og ekstreme vegar. Difor arbeider vi målretta med fellesskap og er takksame for alle som deltek.

## Gudsteneste på TV og radio

Våren 2023 fekk vi spørsmål frå NRK om vi kunne tenke oss å vere med som ein av stall-kyrkjelydane til NRK som i løpet av 18 månadar har 8 direkte overførte gudstenester i NRK radio og TV. Grunngevinga var prestar med gode formidlingsevner, og eit mangfaldig og levande gudstenesteliv. Det er verkeleg ei flott anerkjenning for arbeidet vi har bygt opp over tid, og etter ei runde i stab og sokneråd, takka vi ja til utfordringa med ein blanding av frykt og frimod. NRK installerte teknisk utstyr i kyrkja i løpet av september, og vi hadde våre to fyrste gudstenester i november og desember. Dei sju andre gudstenestene skjer vår og haust 2024. Soknerådet ville vi skulle synleggjere mangfaldet vårt både med ulike typar gudstenester og ha medverknad av alle aldersgrupper. Difor har vi lagt opp eit vanleg årshjul der band, kor og ulike musikkstilar, samt mangfaldet med barn, familie, ungdom og meir ordinære gudstenester kjem til uttrykk. Vi har fått god presisjon på overgangar og logistikk, og lærer mykje av å øve oss på å ha detaljert regi og god førebuing. Gudstenestelivet er nerven i det å vere ei kyrkje og kjernen i arbeidet vårt, så vi er glade for å lære meir om dette.



Sokneprest Margit Lovise Holte



Skjermdump frå NRK TV

Sjå gudsteneste frå Ulstein kyrkje i NRK TV her





### Valentinsdagbryllaup

Valentindagsbryllaup var Ulstein sitt svar på ein drop in-kampanje som kyrkja sentralt hadde for å imøtekome alle som hadde utsett dåp og vigslar i pandemien. Vi prøvde det mest for gøy, og erfarte at responsen var overveldande. Sju par via seg på Valentinsdagen 2023, og vi lærte at dette var eit behov som vi ikkje visste om. Ringstad Blomster pynta kyrkja vederlagsfritt, diakonen song solo etter brudepara sine ynskje og laga enkel kyrkje-sjampis etterpå. Kyrkjelydssekretæren tok bryllaups-bilete av brudepara.

Det var stor variasjon i brudepara. Nokre stilte med kvit brudekjole og dress, andre med jeans og joggesko. Det var mest småbarnsforeldre som via seg, og dei gav uttrykk for at dei lenge hadde ynskja å gifte seg i ei enkel, men vakker ramme. Eitt av para sa ja til å kome på TV2 nyheitene.



Susanne var ein av dei som sa ja til sin kjære på Valentinsdagen 2023. Av 34 Valentinsdagvigslar i landet var 7 av dei i Ulstein.

### Bøne- og lovsongskveldar i Ulstein kyrkje 2023

I 2023 har det vorte arrangert åtte Bøne- og lovsongskveldar i Ulstein kyrkje (9. januar, 13. februar, 13. mars, 9. mai, 12. juni, 11. september, 16. oktober og 13. november) med mellom 10 og 20 til stades. Ynskjet vårt for desse kveldane er eit fellesskap i Ulstein kyrkje som ein stad for å søkje Gud gjennom lovsong og bøn, der vi kan legge frå oss kvardagen og det som tynger og finne ro i Gud sitt nærvær.

Under bøne- og lovsongskveldane har vi to bolkar med lovsong og ei bønemandring med ulike stasjonar i kyrkjeromet. Oftast har vi ein refleksjon anten innleiingsvis eller i forkant av bønemandringa. Samlingane har vart ein time med invitasjon til å kome litt før for ein kopp te eller berre å lande i benken. Ingrid Nerhoel leiar lovsongen på ein trygg og god måte. Stein-Ove Thunem frå lovsongsbandet ved Ulsteinvik Bibelsenter steppa inn i samlinga i mars då Ingrid ikkje kunne vere med.

I samlingane har vi brukt å ha eit tema som speglar songval, bibeltekst og refleksjon. Nokre av temaa vi har hatt i 2023 har vore «Nærvær», «Glede», «Nåde» og «Gud gjer alt nytt».

Vi som har tatt initiativ og ansvar for bøne- og lovsongskveldane er ei bønegruppe som starta opp i februar 2018. Bønegruppa består av Mali Åm, Susan Kaul, Karianne Sveen Orvik og Birgit Kjoss Lyng. Det er fjerde året bønegruppa har arrangert bøne- og lovsongskveldar i Ulstein kyrkje.



## Prestetenesta i praksis

Kasualia gjer at prestar si kontaktflate når breitt ut blant folket. Vi har stor oppslutnad på dåp, konfirmasjon, bryllaup og gravferd. Det gjer at ofte i løpet av ei veke møter vi heile livsspekeret frå vogge til grav, og er i løpet av eit år i berøring med svært mange menneske. Det er ei glede og eit privilegium å få vere livsvitne og medvandrarar på ein slik måte.

Folkekyrkja står sterkt i Ulstein. Det viser tal, haldningar og levd trusliv. Den skjulte trua lever i høgste velgåande, og mange er opptekne av å bringe dei kristne verdiane nestekjærleik og menneskeverd vidare i generasjonar. Måtte vi klare å byggje tersklar ned slik at fleire finn vegen til samlingar og gudstenester som nærer tru og fellesskap. Vi treng å lære i lag kva det vil seie å vere kyrkje i vår tid, og vi ynskjer alle gode krefter velkomne.

Individualismen og forbruksmentaliteten i vår sekulære tidsalder hevdar at vi greier oss åleine. Slik kan vi kome i skade for å misbruke livet sine gåver og menneske til vår eigen fordel. "Materialismen er den største utfordraren", sa til og med Meisteren sjølv - og mennesket lev ikkje berre av brød. Skilnader er veksande i lokalsamfunnet vårt og vi møter mange som kjenner på utanforskap og marginalisering. Den praktiske og eksistensielle einsemda er eit folkehelseproblem i vår tid. Alle møtestadar i kyrkja er opne og utan inntakskrav, men for mange kan fysiske og psykiske utfordringar skape hindringar. Prestetenesta ynskjer å vise gjestfridom og kjærleik til alle menneske, og medmenneskelegheit er grunnpilaren i eit tenande leiarskap. Saman med diakonitenesta held vi andaktar på sjukeheimar, vi driv sjelesorg og vi vitjar einsame, sjuke og sørgjande. Det utgjer ein skilnad for livskvaliteten og vi vonar menneske kan kjenne att Gud sin kjærleik og forvandlande nåde gjennom slike møte.

## Born og unge

Born og unge er notida og framtida sin skatt. Vi samhandlar om trusopplæring og konfirmantarbeid, og har stor glede i det mangfaldige og blomstrande kyrkjelydsarbeidet vårt som vi driv i lag med andre organisasjonar. Slike fellesskap på tvers av årskull, utan konkurranse og openheit for alle er av uvurderleg verdi. Det er sterkt å sjå kor mange unge som faldar seg ut og finn ut av talenta sine i livet. Ein ungdom som finn fellesskap, eigenverdi og retning sparar samfunnet for millionar i framtidige tiltak. Vi er glad for alle trygge vaksne som er frivillige leiarar i kor, speidar, Ten Sing og KRIK. I fjor la vi om konfirmantopplegget slik at prestane er deltakande i undervisninga gjennom heile året. Det styrkar teamet og vi vert betre kjende med konfirmantane.



Konfirmantar ventar spent på trappa.



Det er heilt fullt i benkane under konfirmasjonsgudstenestene. Under ei av dei måtte vindauget kakkast opp for å få lufta ut på ein elles fantastisk strålende og varm dag.



## Livets utgang

Det er ein kunst å leve, og det er eit stykke livsarbeid å sleppe livet for å dø. Mange som får ei alvorleg diagnose med dødeleg utgang ber prestar inn som reisefølge i siste delen av livsetappa. Under vår strenge teieplikt har vi sterke møtepunkt der menneske i lys av livets utgang kan fortelle om livet sitt, og forsonse seg med det som vart og det som ikkje vart. Slik finn mange kraft til å leve si siste tid slik dei ynskjer, og opne for at familien kan ta farvel, uttrykke kjærleik og finne forsoning. Desse prosessane er tillit vi verdset og takkar for, og vi ber alle desse som skattar i vårt indre og i bøn fram for livets Gud.



Kapellan Mirjam Håland Igland

## Saman på ferda

Team-kulturen er gullet i Ulstein kyrkje. Gjennom åra har vi opparbeidd oss ein kultur med samhandling på tvers av kyrkjefaglege skilje. Den består av fagleg og praktisk refleksjon, og ein arbeidskultur der vi samhandlar og støttar kvarandre. Det gjer at kvar grein av arbeidet heng saman med andre. Arbeidspresset og aktivitetsnivået er høgt, noko som er utfordrande, særleg då lokalitetane er til hinder og under einkvar kritikk. Vi har mening og glede i tenesta og ser fram til vidare samarbeid med soknerådet om korleis fleire frivillige kan ta ansvar og fange opp initiativ som byggjer relasjon og tilhøyre til kyrkja.

Alle er velkomne til å vere med - «Saman på ferda».



Vi fekk i 2023 ny lilla stola, sydd av tekstilkunstnar Laila Endresen.



DRYPP

### **DRYPP ungdomsgudsteneste**

Våren 2023 hadde vi to DRYPP-ungdomsgudstenester. Disse gudstenestene er det ungdomar sjølv som er med på å lage, i ramma av ein DRYPP-liturgi.

Dei bestemmer tema og songar vi skal synge. Ungdom deltek som møteleiarar, forsongarar, deler bibelvers og spelar i band. DRYPP-ungdomsgudsteneste er eit godt samlingspunkt for ungdom og det er også ein del konfirmantar som kjem på desse.

DRYPP-ungdomsgudsteneste er noko vi ynskjer å halde fram med, og i desember 2023 vart det laga ny komite bestående av fire ungdomar og prest Mirjam. Denne er no godt i gang for 2024.

### **Barnas kyrkje og søndagsskulen**

Vi ynskjer at det skal vere godt for barnefamiljar i kyrkjelyden vår å kome til kyrkja. Difor har vi forsøkt å lage ei oversikt over kva for søndagar som er tilrettelagt for barn. Denne oversikta har vi printa ut på A5-ark og kalla «Barnas kyrkje».

Vi har familiegudsteneste om lag ein gong i månaden, og søndagsskule er ofte to gongar i månaden – på Sundgot bedehus og på Fredheim. Vi er takksame for dei frivillige som legg til rette for at born kan kome til søndagsskule og høyre bibelforteljingar, og få oppleve det kjekke og oppbyggjande ved det kristne fellesskapet.

### **Kveldsmøte for unge vaksne**

Hausten 2022 starta vi med kveldsmøte for unge vaksne, og det har vi halde fram med gjennom 2023. Det har vore seks kveldsmøter i løpet av året. Dette har vore eit fint møtepunkt for unge vaksne i alderen 25-45 år i kyrkjelyden vår. Før møtet er det ein uformell kveldsmat bakerst i kyrkja, og sjølvve møtet består av lovsong, andakt og bøn.



Kveldsmøte for unge vaksne

### **Alive**

Kvart år deltek vi på ALIVE-ungdomsfestival, siste helga i oktober. Det er tradisjon med nattverd i kyrkja på laurdagskvelden, og kyrkjelyden blei invitert til tverrkyrkjeleg møte på Sjøborg denne helga. Mirjam Håland Igland er med i planlegginga av festivalen, og det er mange ungdomar frå kyrkjelyden som er involverte. Nokre som deltakarar, andre er engasjert med ulike oppgåver.

### **Spor**

Spor er kveldsmesse med song og samtale som vi har utvikla over år. Det har godt oppmøte og vert bore av den gode musikken til Holy Ghost band som spelar kvar gong. Samtalegjestar i 2023 har vore kommuneoverlegen som losa oss gjennom koronapandemien, Norunn Kirkebø Elde, leiar i Norges kristne råd Erhard Hermansen og forfattar Ingunn Røyset.



Alive-festivalen

# UNDERVISNING, BARN OG UNGDOM

*Ulstein kyrkje ynskjer å stå saman med familiane i løftet om å la barna få vekse opp i den kristne trua. Vi legg vekt på å lage gode arrangement, der barna føler seg sett og trygge. På arrangementa vil vi ha fokus på fellesskap og på å gje dei unge kjennskap til kyrkja, høgtidene, kristen tru og tradisjon.*



Aktivitetsskveld med KRIK og Ten Sing



Kateket Bjørn Losvik og trusopplærer Ingrid Madli Sæter



Ungdommar frå Ulstein Ten Sing under Ulsteinmessa 2023. Foto: Svein Arne Orvik.

## Tilbod på ulike alderstrinn:

- 0 år: Dåpssamtale, Byggekllossen, babysong
- 2 år: Samling med song, utdeling av spisebrikke og lunsj.
- 4 år: Gudsteneste med utdeling av "Mi kyrkjebok"
- 5 år: "Sauen som blei borte"
- 6 år: Dåpsskulen

- 1. kl.: Skapt (ute i krinsane)
- 3. kl.: Tårnagent i kyrkja
- 5. kl.: Bibelutdeling / Kode B
- 6. kl.: Adventsnatt i kyrkja
- 7. kl.: Aktivitetskveld med KRIK og Ten Sing
- 9. kl.: Konfirmantundervisning

15-18 år:

- DRYPP-ungdomsgudsteneste
- MILK-kurs
- Ungdomsleiarhelg
- Leiartrening på leir
- Alive-festival
- Ulike tilbud i samarbeid med ungdomsorganisasjonar

## Adventsnatt i kyrkja

Adventsnatt i kyrkja er ikkje eit nytt tiltak, men eit døme på eit tiltak der vi har gjort små endringar. Dette tiltaket var tidlegare kjent som «Lys Vaken», eit tiltak som er utvikla og sendt ut frå Den norske kyrkja sentralt. Ulstein sokn har brukt delar av dette ressursmaterialet, endra det undervegs, og lagt til egne element for at det skal fungere i vårt kyrkjebygg. Til Adventsnatt i kyrkja inviterer vi 6. klassingar til eit døgn i kyrkja, med aktivitetar, mat, lek og overnatting. Døgnet avsluttast med deltaking på gudsteneste første søndag i advent.



Adventsnatt i kyrkja

## Trusopplæringa i Ulstein sokn

Det som peikar seg ut på trusopplæringsfeltet i 2023 var innføringa av to nye arrangement. I juni gjennomførte Ulstein sokn for fyrste gong Aktivitetskveld med KRIK og Ten Sing for 7.-klassingar.

Som eit ledd i arbeidet med å rekruttere og ta vare på ungdomsleiarane våre vart det i november arrangert Ungdomsleiarhelg, med vekt på å bygge fellesskap og jobbe mot eit felles mål.


## Aktivitetskveld med KRIK og Ten Sing

Eitt av to nye trusopplæringstiltak i 2023 var Aktivitetskveld for 7.-klassingar i samarbeid KRIK og Ten Sing. Overgangen frå barneskule til ungdomsskule kan vere utfordrande og arrangementet er tenkt som eit tiltak for å hjelpe på dette. Tanken er å samle 7. klassingar frå heile Ulstein kommune til ei samling der dei kan bli litt kjent med kvarandre, og i tillegg få presentert KRIK og Ten Sing som to gode fritidsaktivitetar å bli med på når dei startar på ungdomsskulen. Aktivitetskvelden er lagt til juni, slik at dei har det relativt friskt i minne ved skulestart etter sommarferien. Det vart ein vellukka kveld med mange ungdommar, og vi tenker at dette vert eit fast årleg tiltak.



Aktivitetskveld med Ten Sing og KRIK

*Konfirmanttida i Ulstein byr på leir, gudsteneste, diskusjon, undervisning, bibel, bøn, lystenning, leik, fellesskap, gode opplevingar ... og mykje meir!*



## Konfirmasjon

Andre helga i september 2023 var det til saman fire festgudstenester i Ulstein kyrkje, der i alt 78 ungdommar vart konfirmert. Ulstein sokn har eit stabilt deltakartal på konfirmasjon over mange år, og ligg markant høgare enn landsgjennomsnittet for Den norske kyrkja. Å reise på konfirmantleir er eit høgdepunkt i konfirmantåret. På førre side finn den ivrige lesar ein del bilete frå konfirmantleir. Alle konfirmantar deltek på leir i fem dagar, og mykje av undervisninga foregår der.

## MILK

Å kurse ungdommar til å bli leiarar på konfirmantleir og i anna ungdomsarbeid er viktig. I så måte er Minileiarkurs (MiLK) for 10.-klassekullet viktig. Det er gledeleg at så mange som 12 ungdommar vart med på MiLK hausten 2023. Desse ungdommane blir viktige leiarar i konfirmantarbeidet og ungdomsarbeidet i åra framover.



Lysmesse



Utan ungdomsleiarane våre hadde vi ikkje kunne gjennomført konfirmantleir så suksessfullt. Tusen takk!

## Kontakt med barnehagar og skular

Vi er glade for dei faste årlege samarbeidspunkta vi har med barnehagar og skular i Ulstein kommune, som og vart vidareført i 2023. Andreklassingane frå skulane og barnehagane kom til kyrkja for å lære om påska gjennom å delta i påskevandring. Vi gjennomførte som vanleg skulegudstenester og barnehagegudstenester i desember.

Det er kjekt at barnehageborna lagar pynt som blir hengande under galleriet i advents- og juletida. I haustsemesteret fekk alle femteklassar besøk av kateket i ein KRLE-time, med eit undervisningsopplegg om Bibelen.



Påskevandring med barnehagane

Alder	Trusopplæringstilbod	Oppslutnad i %					Snitt i %
		2019	2022	2021	2022	2023	2019-2023
0	Babysong	77	48	41	51	76	54
0	Dåpssamtale	108	95	93	116	91	103
2	Songsamling med lunsj og utdeling av spisebrikke	43	97*	32	28	34	50
4	Undretur i kyrkja og gudsteneste/utdeling av bok	88	95*	95*	66	71	86
5	Sauen som vart atffunnen, leik og forteljning	25	-	-	38	43	32
6	Dåpskule. 5 samlingar, 2 gudstenester	57	43	-	42	42	47
7	1. klasse Skapt	71	61	70	63	-	66
7	2. klasse Nytt liv + hausttakkefest i kyrkja	40	69	61	50	-	55
9	3. klasse Tårnagent + gudsteneste	64	-	71	75	49	70
10	5. klasse Kode B	33	43	49	50	38	44
11	6. klasse LysVaken/Adventsnatt + gudsteneste	47	-	40	48	31	45
13	Endeleg ungdom	-	-	-	-	20	20
15	Konfirmasjon	91	94	95	94	88	94
	<b>Totalsum</b>	<b>62,00 %</b>	<b>71,67 %</b>	<b>64,70 %</b>	<b>59,92</b>	<b>53,00</b>	<b>62,13 %</b>

### Torsdagskveld på Fredheim i 2023

Torsdagsmøta på Fredheim er eit samarbeid mellom Ulstein sokn, Ulstein KFUK-KFUM og Ulstein NMS. Komitéen har i 2023 bestått av Ole Martin Grevstad for Ulstein KFUK/KFUM, Cecilie Frantsen Skeide og Inge Kaldhol for Ulstein NMS, sokneprest Margit Lovise Holte og kateket Bjørn Losvik for Ulstein sokn.

#### I vårsemesteret 2023 vart det arrangert 2 temakvelder:

16.02: «Etter demenskorset: Songen og musikken, ei forvandlande kraft» v/ Øystein Bjørdal.

20.04: Religionspsykologisk foredrag om korleis vi skaper våre gudsbilde. Barnevernspedagog og familieterapeut Gry Anita Grønmyr Jonberg ved Ulstein helsestasjon presenterte tilknytningsteori, og Margit Lovise Holte delte kunnskap om korleis denne teorien vert brukt for å forstå og forske på korleis vi formar våre gudebilde.

#### I haustsemesteret 2023 vart det arrangert 4 temakvelder:

14.09: Temakveld v/ Ulstein NMS om soknet sitt misjonsprosjekt i Midt-Austen, ved Jostein Solbakken.

05.10: Songkveld med SUFH.

26.10: LE DEL SE. Tema v/ Ole Martin Grevstad og Kristian Steinsvik.

16.11: Kunstig intelligens. Tema v/ Sveinar Kleive og Berge Myrene.

For komitéen  
Bjørn Losvik

# KYRKJEMUSIKK I ULSTEIN KYRKJE

*Eg spelte på fløyte – Ulstein kyrkje sitt eige musikkteater - blei urframført i eit fullsett Sjøborg kulturhus 18. mars. Michelle Öhman starta som kantor 1. august. Det blei mange musikalske høgdepunkt i Ulstein kyrkje.*

Musikken og kulturen engasjerer breidt gjennom det kyrkjemusikalske arbeidet. Våren 2023 var vi utan fast kantor, men vi var ikkje utan god musikalsk støtte i arbeidet vårt. Ein stor takk til alle som hjalp til i denne tida. Nypensjonist Ståle Helvig spelte på mange gudstenester, mange andakter og dei fleste gravferder på våren. Oddgeir Nygjerde var hyra inn som pianist for Korklubben og Tween Sing og på mange andakter. Ingrid Nerhoel, Ingfrid Grimstad, Andreas Lunde, og Andres Sæbø spelte også til nokre gudstenester. Stor takk til alle saman!

## Eg spelte på fløyte

Utan stor frivillig innsats hadde heller ikkje kyrkjebakkespelet, musikkteateret «Eg spelte på fløyte» blitt noko av. Frivillige skodespelarar brukte mange ettermiddagar og laurdagar med å få replikkane og songane til å sitte. Dagfinn Olav Bye som regissør klarte på meisterleg vis å få dei involverte til å levere to framsyningar som skapte engasjement, og som fekk fram viktige teologiske og samfunnsmessige spørsmål. Både spørsmål frå gamal tid, men også mykje som er aktuelt i dag. Ideen om spelet har vore jobba med i om lag 15 år, men først i 2019 med framlegg av eit tekstmanus av Jan Ove Ulstein og tilhøyrande musikk skrive av Henning Sommerro blei det meir konkret. Framsyninga var planlagt i 2021, men grunna koronapandemi måtte dette utsetjast. I musikkteateret blei teaterframsyninga og filmsekvensar, laga av Per Eide, kombinert og skapte ein heilt eigen dynamikk for stykket. Ståle Helvig var kapellmeister for eit flott orkester og CorSonus stilte med vakker korsong. Amatørskodespelarar briljerte med både song og nydeleg framførte replikkar. Urframsyninga var 19. mars, og vi fekk ei reprise under Smak av Ulstein 11. juni.

Å kunne skape eit kulturelt høgdepunkt i lokalsamfunnet som kyrkjelyd er eit privilegium. Vi er veldig glade for interessa publikumet har vist, og vi vil rette ein stor takk til alle som har bidrege som engasjerte skodespelarar i film og på scena, for nydeleg framført song og musikk, for bidrag til historiske bilete som kulisser, rekvisitar, båt, hest og kjerre og alt det andre praktiske som skulle til. Vi vil og takke Musikkfondene, Sparebanken Møre, Ulstein Group og Møre bispedømeråd for økonomisk stønad som var avgjerande for å kunne gjennomføre prosjektet.



1. Henning Sommerro skreiv musikken til spelet, Jan Ove Ulstein skreiv manuset, og Dagfinn Olav Bye hadde regien.

2. Øyvind Havåg og Aurora Bjerkvik spelte det unge paret Torfinn og Hulda.

3. Gerd Vik Flø og Kristin Sundgot Ottesen spelte Olina og Oluffa. Alle foto: Ole-Ottar Høgstavoll / Vikebladet Vestposten

Sjå opptak frå generalprøve av Kyrkjebakkespelet her:







### Ny kantor

Til stor glede for kyrkjelyden starta Michelle Öhman som kantor i Ulstein kyrkje 1. august. Ho starta med orgel-undervisning med to elevar og vi fekk også stønad frå Kirkerådet for å kunne satse på orgelskule i Ulstein i samarbeid med Ulstein kulturskule.

### Kyrkjemusikalsk utval

Kyrkjemusikalsk utval har kome godt i gang. Desse sitt i utvalet:

Jette Hougaard Holstad, Andreas Lunde, Kamilla Grimstad Hagen, Tomine Sævik Voldsund, Michelle Öhman og Gunn Marthe Pieroth (sistnemnde frå 2024 av).

### Konsert- og musikkarbeid gjennom året

- 29.01. Kveldsmøte
- 13.02. Bøne- og lovsongskveld
- 26.02. Kveldsmøte
- 13.03. Bøne- og lovsongskveld
- 18.03. Kyrkjebakkespelet
- 26.03. Kveldsmøte
- 13.04. Kveldsmøte
- 09.05. Bøne- og lovsongskveld
- 08.06. Konsert med Ulstein mannskor
- 11.06. Reprise Kyrkjebakkespelet
- 12.06. Bøne- og lovsongskveld
- 03.09. Kveldsmøte
- 11.09. Bøne- og lovsongskveld
- 01.10. Kveldsmøte
- 16.10. Bøne- og lovsongskveld
- 05.11. Allhelgenskonsert med Jazz & Koral og Vox Virorum
- 11.11. Konsert med Musiklaget ULF og Barvii
- 12.11. Kveldsmøte
- 13.11. Bøne- og lovsongskveld
- 29.11. Kulturskulekonsert
- 03.12. Adventskonsert med Søre Sunnmøre ungdomssymfoniorkester og Volda Vokal
- 13.12. Musikandakt - Luciamorgon
- 17.12. Syng jula in – Con Moto
- 22.12. Julenattine



Jazz og Koral.

Foto: Andreas Bjerknes / Vikebladet Vestposten



Julenattine.

Foto: Linda Eikrem / Vikebladet Vestposten

### Musikalsk deltaking

Dei tradisjonelle eigne konsertane blei også gjennomført i 2023. Jazz & Koral fekk med seg Vox Virorum i år og Julenattineen blei den store hendinga igjen rett før jul. Kveldsmøte for unge vaksne og Bøne- og lovsongskveld har blitt faste musikkandakter i Ulstein kyrkje ein gong i månaden og her er det frivillige musikalske krefter som står for musikalske uttrykk, som gir kyrkjemusikken ei større bredde.

## Korklubben og Tween Sing

Korklubben, Tween Sing og Ten Sing hadde også i 2023 sine faste plassar i gudstenestelivet. Mange solistar og instrumentalistar deltok i musikken i gudstener i Ulstein kyrkje og vi er glade for at så mange ynskjer å engasjere seg. Sjå meir om Ten Sing i neste kapittel.

### Korklubben og Tween Sing, nokre høgdepunkt

05.02. Gudsteneste	Korklubben
19.03. Gudsteneste	Begge kora
11.06. Opptreden på Ulsteinmessa	Begge kora
12.06. Gudsteneste på Kjeldsund	Tween Sing
20.08. Gudsteneste i Ulstein kyrkje	Begge kora
17.09 Gudsteneste	Korklubben
01.10 Gudsteneste	Tween Sing
03.12 Gudsteneste	Tween Sing
17.12 Gudsteneste NRK	Tween Sing
24.12 Gudsteneste Julaftan	Korklubben

### Leiarar for kora

#### Korklubben

Oddgeir Nygjerde og  
Bente Anita Pilskog

#### Tween Sing

Våren:  
Oddgeir Nygjerde og  
Anne Marie Sødal

Frå hausten:  
Michelle Öhman, Kamilla Grimstad  
Hagen og Line Aksnes

Styret, som er felles for begge kora, har vore samansett slik fram til årsmøtet i september 2023:

Kari Kalvatn Edinsen	– styreleiar
Hilde Kalvatn Eidem	– styremedlem
Lisa Brekke	– styremedlem
Veronica L. Jensen	– styremedlem
Oddgeir Nygjerde	– Kasserar, men ikkje medlem i styret

Nytt styre vart valt 25. september 2023:


Oda Jonette Hofset	– styreleiar
Janne Aschehoug	– styremedlem
Kamilla Grimstad Hagen	– styremedlem, representant for Ulstein KFUK-KFUM
Pianist: Oddgeir Nygjerde	
Dirigent: Bente Anita Sæter Pilskog	

Tween Sing har hatt øving annakvar torsdag på Fredheim og hadde 16 betalande medlemmar 2023. Korklubben har hatt øving annakvar måndag på Fredheim, og hadde 20 betalande medlemmar 2023.

Det er ein fin gjeng som er med i koret, men utfordringa er heile vegen å nå ut til nye som vil vere med, og særleg gitar.



Logoen til korklubben



Logoen til Ulstein Tween Sing



Korklubben under Ulsteinmessa 2023. Foto: Svein Arne Orvik



Tween Sing under Ulsteinmessa 2023. Foto: Svein Arne Orvik

# SAMARBEID MED BARNE- OG UNGDOMS-ORGANISASJONANE

**Ulstein sokn har eit regelmessig samarbeid med:**

**Ulstein KFUK-KFUM**  
Leiar: Arnt Ole Grimstad

**Ulstein Ten Sing**  
Leiar: Ruben Voldsund

**Ulstein KFUK-KFUM speidarar**  
Leiar: Christfried Kaul

**KRIK Ulstein**  
Leiar: Øyvind Erdal Christiansen

**NMSU Kontakt:**  
Brita Petrin Kvalsvik

**Ulsteinvik søndagsskule**  
Leiar: Kamilla Grimstad Hagen

**Hasund søndagsskule**  
Leiar: Margit Sundgot Aarland

**Ulstein KFUK-KFUM speidarar**

Gruppeleiar: Christfried Kaul  
Styret: Hanne-Marte Grimstad Sukka, Torstein Vattøy, Tord Aksnes, Johannes Kaul

I Ulsteinspeidarane er det følgjande grupper: Stifinnar for jentene (3.-4. klasse), stifinnar for gutane (3.-4. klasse), vandrjenter (5.-10. klasse), vandrargar (5.- 10. klasse) og roverar (11. klasse - 25 år). Ved utgangen av året hadde vi 226 betalande medlemmar inkl. leiarar. Dette vitnar om ein stor og aktiv tropp!

Dei 13 patruljene har møte om lag annankvar veke. Møta føregår for det meste ute, og mange patruljer har fast leirplass. Aktiviteten i gruppa er i hovudsak retta mot friluftsliv og opplæring i diverse speidaraktivitetar som leirbygging og naturkunnskap, men også personleg utvikling og samarbeid i gruppe. Det er framleis mange stifinnarar og her trengs det litt foreldrehjelp slik at ein kan dele dei opp i mindre grupper under patruljesamlingar. Høgdepunkta er overnattingsturane, men også Fredheimbasaren - og ikkje minst er speidargudsteneste på hausten ein viktig del av speidaråret.

## KRIK Ulsteinvik

KRIK Ulsteinvik er eit aktivt miljø med to ulike aktivitetsgrupper og omlag 170 betalande medlemmar, og dette inkluderer også familiemedlemmar og støttemedlemmar. Ung/VGS-KRIK: Kvar fredag. 20 i gjennomsnitt pr. samling. Mini-KRIK: Samlingar er kvar måndag, med gjennomsnitt på 30 oppmøtte. Det har også vore arrangert den årlege KRIK- gudstenesta, samt hyttetur.

## Søndagsskule

Søndagsskulane har samlingar annankvar veke på Fredheim og på Sundgot bedehus. Sundgot har fått seg ein oppsving hausten 2023. I Ulsteinvik er søndagsskulen med i kyrkja i starten av gudstenesta og går til Fredheim før tekstlesingane. I Ulsteinvik er det også tårnagentklubb for dei over 8 år.

## Ulstein Ten Sing 2023

Ansvarleg vaksenleiar:	Ruben Voldsund
Vaksenleiar:	Andreas Sæbø, Kari-Janne Ljones Kulø, Reidar Kulø, Gunhild Snipsøy, Hildegunn Valen Kleive, Jan Einar Roos, Ingvild Roos
Styreleiar:	Andreas Sundgot (vår), Martha Giil Vågeskar (frå hausten)
Økonomileiar:	Oddgeir Nygjerde
Danseleiar:	Aurora Bjerkvik (vår), Jenny Nygjerde og Linea Ulstein Voldsund (haust)
Filmleiar:	Martyna Bender, Hedda Ljones Kulø (vår), Eivind Bjåstad Hovlid (haust)
Dirigent:	Marthe Sandvik Skeide (vår), Sofie Aksnes og Ovidie Barstad Nerbø (haust)
Bandleiar:	Ane Øvrelid Solås (vår), Sveinung Bjørnson Snipsøy (haust)
Øvrige styremedlemmar:	Vår: Andreas Sæter (vara), Lucian Bolduan, Martha Giil Vågeskar Haust: Osvald Nygjerde (vara), Andreas Sæter, Louise Kaul, Ingeborg Høydal Sjur Ljones Kulø

## Aktivitetar

Hausten 2023 vedtok styret for første gong på femten år å endre øvingstidene. Ulstein Ten Sing har alltid hatt øving på Fredheim kvar onsdag mellom 19.00-21.30, og desse rammene vedtok styret at ein skulle halde fram med. Det som derimot vart endra var tidspunkt for kvar einskild aktivitet. Frå september 2023 tek samlingane til med ein halvtime felles leik, ein halvtime korøving, ein halvtime pause med info og andakt, ein ny halvtime med korøving før vi avsluttar samlinga med å synge velsigninga saman. Sistnemnde er ein årelang tradisjon. Dermed vert den siste halvtimen kvar onsdag sett av til sosialt - det vere seg prat, spel, dansing og alt i mellom. Ein gong i månaden har vi også hatt gruppeøving. Her kan ein velje å jobbe fram prosjekt i anten dans, film, drama eller leik. Det som vert produsert i desse gruppene vert framført ved ulike høve. Desse onsdagane har vi også avslutning i kyrkja der vi får eit ord for kvelden, og gjerne ei lita bønnevandring.

Det har vore mange høgdepunkt i 2023. Vi har delteke på DRYPP-ungdomsgudsteneste, vore på Vintertreff på Larsnes, sunge på speidarane sitt landsting, delteke på Ulsteinmessa, og arrangert aktivitetkveld for 7.klassingar i lag med KRIK og Ulstein sokn for å rekruttere nye medlem. I mai var vi også svært sentrale i oppstart av Herøy Ten Sing, som fekk godt frammøte og ein god start. Av høgdepunkt på hausten må vi nemne Gospel Night - eit arrangement vi har stått for i nesten tjue år. Hit kom dei andre Ten Sing-gruppene i krinsen, og kyrkja var atter ein gong full av tilskodarar. Vi har igjen delteke på Fredheimbasaren, og som ved alle andre år har vi avslutta året på vår måte med eit ordentleg juleball.

## Vurdering av arbeidet

Etter sommaravslutninga i 2023 gjekk mange ut av Ten Sing på grunn av flytting og vidare studier. Til tross for at vi då mista mange medlemmar kom det enda fleire nye på hausten. Ulstein Ten Sing er i ei særstilling i Ten Sing-Norge. Vi er framleis ei av dei største Ten Sing-gruppene i landet. Vi er ikkje redde for å satse nytt, kjøpe nødvendig utstyr eller finne på nye prosjekt. I 2023 har vi mellom anna oppgradert bandutstyret ytterlegare slik at vi i dag har eit bandrom med alt av utstyr som trengs for å spele i band. Ingen treng å stille med noko personleg utstyr, noko som vil kunne inkludere enda fleire til aktiviteten.

Innføring av ein sosial halvtime på slutten av kvar samling er med på å bygge eit godt fellesskap. Ulstein Ten Sing skal alltid vere ein trygg møteplass der alle vert sett, der alle har ei stemme, og der ein kan få uttrykke seg kreativt.

Betalande medlemmar per 31.12.23: 56

Styreleiar Martha Giil Vågeskar

Vaksenleiar: Andreas Sæbø

Ansvarleg vaksenleiar: Ruben Voldsund



Ten Sing under Ulsteinmessa 2023. Foto: Svein Arne Orvik

# ULSTEIN SOKNERÅD

Soknerådet er styringsorganet til den lokale kyrkjelyden, og har det strategiske ansvaret for å vere kyrkje lokalt. Rådet vert valt på nytt kvart fjerde år. Inkludert kommunal representant blir soknerådet utvida til Ulstein kyrkjelege fellesråd, som har ansvaret for økonomi, kyrkjebygg og gravferdsforvaltning. Ulstein kyrkjelege fellesråd er arbeidsgjevar for alle tilsette i kyrkjelyden, utanom prestane.

## Ulstein sokneråd/Ulstein kyrkjelege fellesråd 2019-2023

### Medlemmar:

1. Odd Arne Vikebakk (leiar)
2. Annelise Kleven Godø (nestleiar)
3. Karianne Sveen Orvik
4. Hannelore Måseide
5. Bodil Muren Voldsund
6. Lidbjørn Vattøy
7. Karete Malén Nettet Melø
8. Cecilie Frantzen Skeide
9. Sokneprest Margit Lovise Holte (geistleg representant)

### Varamedlemmar:

1. André Sæter
2. Andreas Alexander Felix Sæbø
3. Åsmund Lunde
4. Kristian Osnes
5. Hildegunn Lillebø Fiskerstrand
6. Kapellan Mirjam Håland Igland (geistleg vara)

Sekretær: Kyrkjeverje Christfried Kaul

Ulstein kommune sin representant i kyrkjeleg fellesråd: Ordførar Knut Erik Engh

Kommunal vararepresentant: Varaordførar Stian Skorgen Scheide

## Utval og kontaktpersonar

### Arbeidsutval:

Odd Arne Vikebakk, Annelise Kleven Godø, Cecilie Frantzen Skeide, Margit Lovise Holte, Karete Malen Nettet (vara), Christfried Kaul (sekretær).

### Gudstenesteutval:

Karianne Sveen Orvik, Margit Lovise Holte, Mirjam Håland Igland, Ståle Helvig, Inge Kaldhol (sekretær).

### Diakoniutval:

Cecilie Frantzen Skeide, Mari Ann Vattøy.

### Undervisningsutval:

Karete Malén Nettet Melø, Ingrid Madli Sæter, Bjørn Losvik.

### Kyrkjemusikkutval:

Øyvin Sønnesyn, Jan Thomodsæter, Ståle Helvig, Bodil Muren Voldsund.

### Planutval for nytt kyrkjebygg:

Harald Nordal (leiar), Jostein Kiperberg, Svein Arne Orvik, André Sæter, Arne Runar Vik, Margit Lovise Holte, Christfried Kaul (sekretær).

### Kyrkjekunstkomiteen:

Øyvin Sønnesyn, Linda Hasund, Hugo Opdal, Margit Lovise Holte, Christfried Kaul.

### Vedlikehaldsutval Ulstein kyrkje:

Lidbjørn Vattøy, Åsmund Lunde, Christfried Kaul.

### Kontaktperson Kirkens SOS:

Mali Åm.

## Kyrkjeval 2023

Det blei gjennomført kyrkjeval 11.09.23, samstundes som kommunestyreval. Deltakinga i kyrkjevalet for Ulstein sokn var under forventninga, der 614 av 5536 medlemmar med røysterett brukte røysteretten. Det er berre 11% oppslutnad. 260 røyster blei gitt digitalt, noko som for første gong var mogleg ved kyrkjeval. Ved dei 354 røystene gjevne på papir, var 74 av dei førehandsrøyster. På 69% av dei leverte røystene har veljarane gitt personlege røyster til kandidatane.

## Ulstein sokneråd/Ulstein kyrkjelege fellesråd 2023-2027

### Medlemmar:

1. Odd Arne Vikebakk (leiar)
2. Silje Kiperberg Aksnes (nestleiar)
3. Øyvind Grimstad Hagen
4. Linda Hasund
5. Cecilie Frantsen Skeide
6. Ingrid Redse Mjaaseth
7. Berge Myrene
8. Gunn-Marte Veddegjere Pieroth
9. Sokneprest Margit Lovise Holte (geistleg representant)

### Varamedlemmar:

1. Beate Hopland
2. Monica Leine Tokheim
3. Janne Fylsvik Rønningen
4. Marianne Follesøy Kaldhol
5. Mali Åm
6. Kapellan Mirjam Håland Igland (geistleg vara)

Sekretær: Kyrkjeverje Christfried Kaul

Ulstein kommune sin representant i kyrkjeleg fellesråd: Ordførar Stian Skorgen Scheide

Kommunal vararepresentant: Varaordførar Lisa Mari Breivik Anderson

## Utval og kontaktpersonar

### Arbeidsutval:

Odd Arne Vikebakk, Silje Kiperberg Aksnes, Berge Myrene, Margit Lovise Holte, Christfried Kaul (sekretær)

### Administrasjonsutval:

Odd Arne Vikebakk, Silje Kiperberg Aksnes, Berge Myrene, Ingrid Madli Sæter (tillitsvalt), Lill-Marte Apelseth Solbakken (Verneombod), Christfried Kaul.

### Kontaktperson Kirkens SOS:

Mali Åm.

Dei øvrige utvala for den nye soknerådsperioden var ikkje oppnemnde per 31.12.2023.

## Saker som soknerådet har arbeidd med

- innspel Kommuneplan samfunnsdel 2023
- Samarbeid om ny ungdomsklubb i Ulsteinvik
- Bestilling av stolar passande til kyrkjetekstilane i Ulstein kyrkje
- Arbeid i utval
- Kirka vår - samla plan for arbeid i kyrkjelyden
- Saman som kyrkje i heile verda 2023
- Kyrkjeval 2023
- Gudstenesteplan og semesterplan for Ulstein sokn hausten 2023 og våren 2024
- Årsmelding for Ulstein sokn 2022
- Lydanlegg i Ulstein kyrkje - rutiner og fornying
- Rekneskap 2022
- Diakonstilling i Ulstein sokn
- Ombygging av kontorlokale
- Møteplan hausten 2023 og våren 2024
- Finansiering av ungdomsarbeidarstilling i soknet
- Sanitærbygg ved Osnes kyrkjegard
- Revisjon av vedtekter for Osnes kyrkjegard
- Tilsetting av diakon i 50%
- Lokal markering Møre bispedøme 40 år
- Stønad for deltaking på Ten Sing seminar, World Wide Jamboree
- Fornya avtale mellom Ulstein kommune og Ulstein sokn 2024 - 2027
- 2. gongs offentleg ettersyn - Interkommunal kystzoneplan for ytre søre
- Søknad om drift av næringsverksemd på Ulstein kyrkjegard
- Opptak av lån, signaturrett på vegne av styret
- Fjerning av krav om betaling for preludering i gravferd
- Oppnemning av nye medlemmar i utval for kyrkje musikk og kultur
- Opa kyrkje i kvardagen
- Budsjett 2023 - tertialrapport august 2023
- Konstituering av det nye soknerådet
- Val av leiar og nestleiar i Ulstein sokneråd
- Val av representantar i utval og kontaktpersonar
- Budsjett 2024 - Økonomiplan 2024-2027
- Val av representantar i utval og kontaktpersonar
- Tildeling av kyrkjeoffer 2024
- Vidareføring av klokkestilling

# ULSTEIN SOKNERÅD 2019-2023



Odd Arne Vikebakk



Annelise Kleven Godø



Karianne Sveen Orvik



Hannelore Måseide



Lidbjørn Vattøy



Karete Malen Nesset



Cecilie Frantsen Skeide



Bodil Muren Voldsund



Margit Lovise Holte  
Geistleg representant



Mirjam Håland Igland  
Geistl. vararep.



Andre Sæter  
1.vara



Andreas Sæbø  
2.vara



Åsmund Lunde  
3.vara



Kristian Osnes  
4.vara



Hildegunn L. Fiskerstrand  
5.vara

# ULSTEIN SOKNERÅD 2023-2027



Odd Arne Vikebakk  
Leiar



Silje Aksnes  
Nestleiar



Øyvind Grimstad Hagen  
Medlem



Linda Hasund  
Medlem



Cecilie Frantsen Skeide  
Medlem



Ingrid Redse Mjaaseth  
Medlem



Berge Myrene  
Medlem



Gunn Marthe V. Pieroth  
Medlem



Margit Lovise Holte  
Geistleg representant



Mirjam Håland Igland  
Geistleg vara-  
representant



Beate Hopland Langnes  
1.vara



Monica Leine Tokheim  
2.vara



Janne Fylsvik Rønningen  
3.vara



Marianne Follesøy  
Kaldhol  
4.vara



Mali Åm  
5.vara



# TILSETTE I ULSTEIN KYRKJELEGE FELLESRÅD 2023



**Christfried Kaul**  
Kyrkjeverje



**Lill-Marte  
Apelseth Solbakken**  
Kyrkjelydssekretær



**Michelle Öhman**  
Kantor



**Bjørn Losvik**  
Kateket



**Ingrid Madli Sæter**  
Trusopplærer



**Karine Sæter**  
Diakon



**Mari-Ann Vattøy**  
Diakoniarbeidar



**Jan Erling Davidsen**  
Kyrkjetenar og  
kyrkjegardsarbeidar



**Marius Erstad  
Schjelderup**  
Kyrkjegardsarbeidar



**Ruben Voldsund**  
Ungdomsarbeidar



**Oddgeir Nygjerde**  
Kantorvikar



**Andreas Sæbø**  
Ungdomsarbeidar  
(engasjement)



**Inge Kaldhol**  
Klokkar



**Ilse Anita  
Eide Moltumyr**  
Kontormedarbeidar



**Vamathevan Sellathamby**  
Reinhaldar

# PRESTAR I ULSTEIN SOKN 2023



**Margit Lovise Holte**  
Sokneprest



**Mirjam Håland Igland**  
Kapellan

# STABEN I ULSTEIN KYRKJE

## Prestar i Ulstein sokn

Sokneprest	Margit Lovise Holte	100% (permisjon januar-mars)
Kapellan	Mirjam Håland Igland	100% (permisjon januar-juni)
Vikarprest	Øystein Bjørdal	(januar-februar)
Vikarprest	Rolf Schanke Eikum	(januar-juni)

## Faste tilsette i Ulstein kyrkjelege fellesråd

Kyrkjeverje:	Christfried Kaul	100%
Sekretær:	Lill-Marte Apelseth Solbakken	100%
Kyrkjjetenar/ kyrkjegardsarbeidar:	Jan Erling Davidsen	100%
Kyrkjjetenar/ kyrkjegardsarbeidar:	Marius Erstad Schjelderup	50%
Kantor:	Michelle Öhman	100% (frå 1. august 2023)
Diakon:	Karine Sæter	50% (frå august 2023)
Diakonvikar:	Mari Ann Vattøy	100% (frå våren 2023)
Diakoniarbeidar:	Mari Ann Vattøy	50 % (frå august 2023)
Barnehageleiar:	Karine Sæter	20%
Kateket:	Bjørn Losvik	100%
Kyrkjelydspedagog:	Ingrid Madli Sæter	100%
Klokkar:	Inge Kaldhol	timebasert (ca. 13%)
Reinhaldar:	Sellathamby Vamathevan	27%

## Prosjektstillingar

Ungdomsarbeidar:	Ruben Voldsund	20%
Ungdomsarbeidar:	Andreas Sæbø	(timebasert, oktober-desember 2023)
Kontorhjelp:	Ilse Anita Eide Moltumyr	(fram til februar 2023)

## Endringar i staben

August 2023 starta Michelle Öhman som kantor.

Frå august 2023 deler Karine Sæter og Mari Ann Vattøy på diakonstillinga 50% / 50%

## Vurdering

Staben i Ulstein kyrkje er eit arbeidslag med ein ganske så låg gjennomsnittsalder til å vere stab i Den norske kyrkja. Dei gode kvalifikasjonane på tvers av tilsette er synleg gjennom eit godt fagleg og tverrfagleg arbeid som inspirerer og som gir rom for å utvikle nye idear. Staben har eit stort engasjement og høge ambisjonar for arbeidet sitt. Nettverket med frivillige og samarbeid med frivillige organisasjonar er viktig for å skape gode tilbod. Aktivitetsnivået er av og til litt høgt.

Ulstein kyrkjelege fellesråd har bedriftshelseteneste.

Lill-Marte Apelseth Solbakken er verneombod, og

Ingrid Madli Sæter tillitsvalt for dei fellesrådstilsette.

## Klokkaren er klokkeklar for å bli pensjonist

2023 var siste året som klokkar for Inge Kaldhol, etter meir enn 41 år i teneste! Stab og sokneråd takkar Inge for den enorme og forbilledlege innsatsen.

For nerds:

Det er faktisk ikkje klokkaren som ringer med klokkene!



Klokkaren og klokka.

Foto: Ole-Ottar Høgstavoll / Vikebladet Vestposten

## Likestilling, integrasjon og mangfold

Det er 10,1 årsverk i dei faste stillingane. Ved utgangen av 2023 var det:

12 faste tilsette, 7 kvinner og 5 menn.  
2 kvinner jobbar deltid i faste stillingar.  
2 menn jobbar deltid i faste stillingar.  
2 prosjektmedarbeidar har eit deltidsengasjement.  
10 av dei fast tilsette har Ulstein kyrkjelege felle råd som arbeidsgjevar, 2 faste tilsette har Møre bispedømeråd som arbeidsgjevar.  
Det er 3 faste tilsette med innvandringsbakgrunn. Det er ingen tilsette med nedsatt funksjonsevne.  
7 av dei fast tilsette har fullført utdanning ved høgskule eller universitet, 4 år eller meir.



Rolf Ante Hætta under samefolkets dag.

## Presteressursar

Margit Lovise Holte er sokneprest og Mirjam Håland Igland er kapellan i Ulstein. Begge har 100 % stilling. Prestetenesta i Ulstein har 1.7 presteressurs, og dermed går 30 % av stillingane våre til å dele gravferdsturnus, vigselsturnus og nokre gudstenester på Hareid. Vi går i treledda tenesteturnus med sokneprest i Hareid, Lars Hartig-Tangedal. Fordelinga inneber at i løpet av eit år har ulsteinprestane mesteparten av gravferder og vigslar på Hareidlandet. Vi har sommarturnus på gudsteneste og andakter i sommarferien.

Frå årsskiftet til juni var kapellan Igland i foreldrepermisjon. Øystein Bjørdal var vikar i januar og februar, og Rolf Schanke Eikum vikarierte frå januar til juni. Eikum var fungerande sokneprest i januar og februar. Igland vart valt som lokallagsleiar i presteforeninga i Søre Sunnmøre.

Januar til mars var sokneprest Holte i studiepermisjon for å fullføre ei masteroppgåve i klinisk sjelesorg ved MF. Ho fullførte oppgåva og tok graden erfaringsbasert master i klinisk sjelesorg. Holte deltok hausten 2023 som representant frå Møre bispedøme i utvekslingsstudiet: «Leading ecclesial change and growth» saman med prestar frå bispedøma Møre og Bjørgvin i Noreg, og Newcastle og Southwark London bispedøma i den anglikanske kyrkja i England. Holte sit i sentralstyret i presteforeninga, og er fungerande prost i Søre Sunnmøre prosti ved behov. Vi er takksame for rutinerte og kompetente vikarar som tek enkeltoppdrag når det trengs: Leidulv Grimstad, Finn-Ove Kaldhol, Mathias Austrheim og Thorvald Grønli.

## Arbeidstilhøve

Eit nedslitt og utdatert kyrkjebygg, manglande aktivitetsrom og utfordrande lokale for administrasjonen er framleis ei stor utfordring i det daglege arbeidet. Både medarbeiderundersøkelsen frå hausten 2023 og bedriftshelsetenesta påpeiker at det er utfordringar ein treng å gripe fatt i.

Behovet for eit nytt kyrkjebygg der aktivitet, administrasjon og eit større og universelt utforma sakralrom har ikkje blitt mindre og Ulstein sokneråd og dei tilsette har ei klar forventning til at det nye kommunestyret ser sitt ansvar og sørgjer for at Ulstein nye kyrkje blir realisert.

Trass i manglande økonomi har kontorlokala blitt pussa opp i den grad det har vore mogleg. Det blei lagt ned dugnadsarbeid av soknerådsmedlem Lidbjørn Vattøy til ein verdi på bortimot kr. 100.000. Også staben sjølv har gjort ein stor innsats med flytting, rydding, ommøblering og smått handverksarbeid. Med ei meir innbydande venteseone og ein betre skjerma arbeidsplass for sekretæren har viktige innspel frå dei tilsette blitt følgt opp.

# BYGG OG ANLEGG

## Ulstein kyrkje

Ulstein kyrkje er opa tysdag – fredag kl 08.00–16.00, og det er mange som er innom for å finne ro, be ei bøn eller la seg inspirere. Kyrkjeromet har ei fin atmosfere og det er eit lokale folk i Ulstein set pris på å kunne bruke til dåp, vigslar, gravferd, gudsteneste og konsert.

Ut frå dagens standard for offentlege bygg er Ulstein kyrkje eit utdatert bygg som byr på store utfordringar på grunn av manglande universell utforming, svært dårlege sanitærforhold og eit fysisk utfordrande arbeidsmiljø. Bygget er dårleg eigna til å drive undervisning, barne- og ungdomsarbeid, diakonalt arbeid, møteverksemd og arrangement der ein treng å kunne bruke fleire rom parallelt i same bygg. I mangel på eigna lokale leiger Ulstein sokn seg inn på Sunnmøre Folkehøgskule, Fredheim, Sjøborg Kulturhus, og ulike andre forsamlingslokale. Staben opplever denne situasjonen som eit hinder for å kunne utvikle kyrkja sitt arbeid i tråd med planar og intensjonar for Den norske kyrkja lokalt og nasjonalt.

På grunn av krevjande økonomi for drift av kyrkjebygget har prosjektet med å male kledning av fasade blitt satt på vent. Også automatisk ringeanlegg og naudsynt arbeid med vedlikehald av oppheng for kyrkjeklokkene og istandsetting av tårnuret er prosjekt som ligg på vent.

Med dagens intense bruk av kyrkjebygget er slitasjen også på interiøret i kyrkjerommet stort. På dei TV- overførte gudstenestene er slitasjen påfallande og det kler Ulsteinsamfunnet dårleg med eit så nedslitt kyrkjebygg. Mange plassar flassar malinga av, mange av kyrkjebenkane er slitte både i konstruksjon og på utsjånad, løparen i midtgangen byrjar å bli slitt igjen, og stolar i alterrommet bør skiftast ut. Den største utfordringa er våpenhuset og toalettfasilitetane under. Dei er under ein kvar standard for eit offentleg bygg og vi håper på ei løyving av midlar for å rehabilitere våpenhuset med underliggende kjellaretasje snarast råd.



Foto: Cecilie Hatløy

## Ulstein nye kyrkje

Behovet for ei ny kyrkje i Ulstein har på ingen måte blitt mindre. Det er høg aktivitet i kyrkjelyden og det eksisterande kyrkjebygget er til hinder for å utvikle aktiviteten vidare slik soknet har ynskje om. Det har vore gjort eit nytt forsøk i 2023 å forankre bygging av Ulstein nye kyrkje i Ulstein kommune sin langtidsplan for investeringar. Ulstein nye kyrkje har kome inn med prioritering 2 i planen.

Med dette held kommunestyret fast ved planen om at Ulstein nye kyrkje skal byggast, men det manglar framleis eit vedtak og eit konkret tidspunkt for realisering. Innsamling av pengar til Ulstein nye kyrkje held fram. I 2023 blei det samla inn kr. 463.542 gjennom kyrkjebyggaravtalen og kr. 51.376 gjennom kyrkjekollekten. Saman med renteinntektene står bundne og ubundne fond på kr. 8.241.412.

## Osnes kyrkjegard

For å bruke resterande areal med ledige graver på ein effektiv måte har Ulstein kyrkjelege fellesråd som gravplassmyndigheit jobba målretta med å gjenbruke flest mogleg graver. Det er tid- og ressurskrevjande, og kan vere ei psykisk påkjenning for dei som jobbar med dette. Gjennom tenesteytingsavtalen bistår teknisk etat i Ulstein kommune ofte ved graving. Slik kan vi garantere at vi alltid arbeider etter HMS-regelverket, som krev at det alltid skal vere to arbeidarar saman på gravingsarbeid. Til å rekke over stell av gravplassen blei det også i 2023 leigd inn sommarvikarar i ferietida.

Stell av gravplass, graving og diverse anna arbeid på anlegget har base i eit driftshus der maskinparken og utstyret har sin plass og naudsynt vedlikehaldsmateriell blir lagra. Arbeidarane har etterlyst isolering av garasja for å kunne utføre noko vedlikehaldsarbeid innandørs på kalde dagar. Også lagringskapasiteten på utsida bør betrast slik at alt utstyr kjem under tak.

Sommaren 2023 har det blitt gjort ei informasjonskampanje der gravplassmyndigheita kjem i kontakt med pårørande for graver som manglar festar eller innbetaling av festeavgift. Det er 269 graver som har blitt merka og det er mange som har tatt kontakt. Nye gravplassvedtekter har blitt godkjent av statsforvaltaren og dermed er vegen open for å etablere namna minnelund og eit urnegravfelt på Osnes kyrkjegard. Det er egne satsar for festeavgift for namna minnelund og urnegraver.

I samband med ønske om auka bruk av kremasjon og gravlegging på urnefelt og namna minnelund har Ulstein kommunestyre også bedt kommuneadministrasjonen om oppretting av eit fond for økonomisk likestilling av kistegravlegging og kremasjon/urnenedsetting.

Behovet for ein ny gravplass er framleis stort, og kommunalt vedtak om areal for utviding eller nyetablering av gravplass let framleis vente på seg.

Det er fleire tre som bør fjernast frå Osneset kyrkjegard og ein bør også lage ein plan for ny beplantning. Dette er eit større økonomisk løft enn det som er mogleg innanfor driftsbudsjettet og må takast litt etter kvart.



Grunnen på Osnes kyrkjegard vart innløyst i 1920, og vigsla 7.september 1924. Den gong god plass - men no er denne gravplassen snart full.



Malinga flassar av fleire plassar i kyrkja. Her illustrert ved skjermdump frå gudsteneste sendt på NRK1.

### Ulstein gamle kyrkjestad

Den første kyrkjeplassen i Ulstein kommune var plassert ved den siste hamna før kryssing av Breisundet vidare til Giske og Borgund. Etter at kyrkja vart flytta til Ulsteinvik sentrum står det nokre gravminne att, den mest verdifulle er etter Christoffer Rønneberg.

Støttemuren for Ulstein gamle kyrkjestad har tatt skade over tid, der mange steinar har rasa ut på nordsida. Det er framleis eit ynskje om å legge betre til rette for markering av staden som eit ledd i Kystpilgrimsleia.

I 2023 har eit geologteam i oppdrag av fylkesmannen gjort analyser om opphavet til nokre av steinane som er brukte for bygging av muren. Det er ikkje publisert noko resultat.



Bautasteinen på Ulstein gamle kyrkjestad til minne om alle som ligg gravlagde her. Steinen vart avduka 13.september 1969 av biskop Juvkam. Fotograf ukjend.

### Kyrkjegarden ved Ulstein kyrkje

Vik kyrkjegard rundt Ulstein kyrkje har status som nedlagd. Å kunne ta deler av denne i bruk igjen som namna minnelund ville gi dette området eit løft og ein bruksfunksjon igjen. Arbeid med dette treng å skje i dialog med vurderingar i forhold til kulturminnelova.



Vik kyrkjegard sett frå kyrkja. Foto: Cecilie Hatløy

### Kyrjekontoret

Kyrjekontoret ligg i andre etasje i Sjøgata 61. Alle tilsette har tilgang på kontorarbeidsplass, men det er mangel på samtalerom til ulik bruk. Møteromet er i minste laget for møte i

Ulstein sokneråd. Tilkomsten til kontoret er ikkje universelt utforma og byr på utfordringar for brukarar. Heller ikkje toaletta på kyrjekontoret er tilrettelagt for folk i rullestol. Bygget er dårleg isolert og ikkje alle kontora har tilstrekkeleg med oppvarming og solskjerming.

Som kontorarbeidsplassar fungerer kyrjekontoret bra, men det bør vere betre fasilitetar for å ta i mot besøkjande til samtalar og andre føremål. Her er spesielt lydisolasjonen ei utfordring.

Som eit resultat etter vernerunden med bedriftshelsetenesta våren 2023 blei det gjort endringar på kontoret, særleg med tanke på resepsjonsområdet og kontor til diakoniarbeid, undervisningsarbeid og kyrkjemusikk. Resepsjonen blei flytta til eit meir beskytta område med dør og luke som kan lukkast ved behov. Det frigjorde område fekk seg ei sofagruppe og staben eller besøkjande har fått eit uformelt mingle- eller venteområde.

Alt arbeid som lovleg kunne utførast på eiga hand blei utført på dugnad av Lidbjørn Vattøy, som har spart soknet for bortimot kr. 100.000 i sparte handverksutgifter. Skiljeveggjar og dører fekk vi donert frå Sunnmøre Folkehøgskule. Staben bidrog med maling, rydding og flytting. Likevel var material- og andre kostnadar langt høgare enn det som låg til vedlikehaldsbudsjettet, men ut frå arbeidsmiljøet var dette eit naudsynt tiltak.



Lidbjørn Vattøy

# STATISTIKK

**Tabell 1: medlemmar, oppslutnad om dåp og konfirmasjon**

	2019	2020	2021	2022	2023
Befolkning	8571	8575	8539	8770	8872*
Medlemmar og tilhøyrande i DNK	6607	6641	6616	6629	6623
% medlemmar i Den norske kyrkja	77,1 %	77,4 %	77,5 %	75,6 %	74,7
Innmelde i DNK	8	4	11	9	7
Utmelde frå DNK	20	21	24	19	23
Fødde i Ulstein kommune	108	85	109	92	82
Døypete, nyfødde som er folkeregistrert i Ulstein*	74	61	78	69	57
Oppslutnad dåp	68,5 %	71,8 %	71,6 %	75,0 %	69,5 %
15-åringar (døypete)**	111	120	85	85	89
Konfirmerte medlemmar i Ulstein	95	112	81	80	78
% konfirmerte av 15-åringar (døypete)	85,6 %	93,3 %	95,3 %	94 %	88%

\*ikkje alle born blir døypete same året dei er fødde. Mange som blir fødde dei tre siste månadane i kalenderåret blir først døypete i løpet av dei første tre månadane i det nye kalenderåret. Difor varierer også tala litt frå år til år dersom ein ynskjer å dokumentere kor mange av dei som blir fødde også blir døypete.

Ulstein kyrkje har framleis høg oppslutnad hjå folk i Ulstein. Grunna busetting av mange flyktningar i Ulstein kommune har det vore ein auke i befolkning. Sidan dei som regel ikkje er medlem i Den norske kyrkja har prosentdelen av medlemmar i Den norske kyrkja gått ned nesten 1%.

**Tabell 2: kyrkjelege handlingar**

Kyrkjelege handlingar	2019	2020	2021	2022	2023
Dåpshandlingar i soknet	76	55	74	66	82
Konfirmerte i kyrkja	92	112	81	80	78
Gravferder	54	52	53	50	49
Kyrkjelege vigslar	15	10	14	12	17

Dåpstala for Ulstein held seg gode og har hatt eit oppsving. Vi legg til rette for digital påmelding slik at par kan sitte i fred og ro heime og finn ut kva tid det passar å ha dåp for dei og familien. Vi ynskjer alle velkomne til dåp, også vaksne og eldre ungdommar. Vi legg gjerne til rette dersom det er utfordringar knytt til gjennomføring.

**Tabell 3: Gudstenester og andakter**

<b>Gudstenester</b>	<b>2019</b>	<b>2020</b>	<b>2021</b>	<b>2022</b>	<b>2023</b>
Antal gudstenester totalt	93	98	80	89	87
Deltakarer, gudstenester totalt	16074	7047	6423	16745	14248
<i>Gjennomsnitt pr. gudsteneste</i>	<i>173</i>	<i>72</i>	<i>80</i>	<i>143</i>	<i>164</i>
Antal gudstenester, søndagar og heilagdagar	56	34	58	54	60
Deltakarer, gudstenester, søndagar og heilagdagar	10963	3301	5276	7826	9643
<i>Gjennomsnitt deltakarer pr. gudsteneste</i>	<i>196</i>	<i>97</i>	<i>91</i>	<i>145</i>	<i>161</i>
Gudstenester utanom søndagar og heilagdagar	37	64	22	35	27
Deltakarer, gudst. utanom søndagar og heilagdagar	5111	3746	1147	4909	4605
<i>Gjennomsnitt deltakarer pr. gudsteneste</i>	<i>138</i>	<i>59</i>	<i>52</i>	<i>140</i>	<i>171</i>
Antal gudstenester i soknet si kyrkje	79	87	57	78	78
Antal gudstenester på institusjon i soknet	9	4	4	3	5
Antal gudstenester på annan stad i soknet	5	7	19	8	8
Antal gudstenester med nattverd	58	27	34	54	47
Deltakarer, gudstenester med nattverd	5129	1673	1872	3636	3515
Antal gudstenester med skriftemål	2	0	1	1	1
Antal familie- og barnegudstenester	12	6	5	10	18
Deltakarer, familie- og barnegudstenester	2714	681	335	1946	3958
Antal gudstenester for barnehagar	3	2	1	3	3
Deltakarer, gudstenester for barnehagane	244	64	150	245	211
Antal gudstenester for skuleelevar	5	1	0	4	4
Deltakarer, gudstenester for skuleelevar	1413	44	0	1102	1251
Antal gudstenester for ungdom	23	9	4	12	14
Deltakarer, ungdomsgudstenester	2516	1063	678	1900	3427
Antal gudstenester med dåp	40	37	33	34	35
Deltakarer, gudstenester med dåp	6620	2866	2723	4510	5444
Antal konfirmasjonsgudstenester	4	8	6	4	4
Deltakarer, konfirmasjonsgudstenester	1800	841	817	1443	1432
Antal julaftangudstenester	3	3	2	3	2
Deltakarer, julaftangudstenester	1015	288	125	796	872
Antal gudstenester i påska	5	9	4	6	6
Deltakarer, gudstenester i påska	656	57	21	574	663
Andakter på institusjon eller aldersheim	72	72	113	101	109




**Tabell 4: Musikk, kultur, leiarutvikling**

	2019	2020	2021	2022	2023
Deltakarar, leiarkurs for unge 13-30 år	22	25	26	21	23
Antal kor for vaksne/familiekor	3	1	1	3	0
Antal kor for barn og unge	3	3	3	3	3
Antal konsertar og kulturarrangement	19	16	25	17	22
Deltakarar på konsertar og kulturarrangement	2544	811	1007	1200	1802
Antal konsertar/kulturarrangement, ekstern regi	7	2	4	6	7
Deltakarar på konsertar/kulturarrangement, ekstern regi	1111	160	998	978	1084

Deltaking på konsertar og kulturarrangement i kyrkja sin regi har gått kraftig ned i forhold til 2019, som var siste året før pandemi. Tala går opp frå 2022 som også delvis bar preg av pandemi, og viser at vi er på rett veg.

Vigselstala har gått opp og dette er særleg knytt til valentinsvigselssdagen der vi lærte at mange unge småbarnsforeldre ynskjer å gifte seg i kyrkja, men med ei anna ramme enn store tradisjonelle bryllaup. Når vi la tilhøva til rette traff det eit behov, og vi lærte meir om korleis vi er ei relevant folkekyrkje i vår tid!

### Gudstenestedeltaking totalt og gjennomsnitt



Vi gleder oss over aktivitet etter koronapandemien sine nedstengingar med restriksjonar som gjekk svært hardt ut over kyrkja sin aktivitet, ofte med strengare føringar enn andre stadar. Tala viser at vi er tilbake på eit godt nivå, men at vi framleis har litt igjen før vi kjem opp på nivået før pandemien. Vi gleder oss over god oppslutnad og ynskjer alle velkomne til gudsteneste - anten det er ein gong i året eller kvar søndag.

# ØKONOMI

Som ein del av tenesteytingsavtalen med Ulstein kommune fører Ulstein kommune rekneskapen for Ulstein sokn.

Driftsrekneskapen for 2023 viser eit meirforbruk på kr. 160.291. Rekneskapen i 2022 viste eit meirforbruk på kr. 330.303, som ein ikkje klarte å dekke gjennom drift i rekneskapsåret 2023. Meirforbruket som må dekkast inn i rekneskapsåret 2024 er dermed på kr. 490.594.

Ein stor del av meirforbruket har oppstått på området løn og kjøp av tenester (vikarbehov). Mykje av dette skuldast uventa høge pensjonspremiar. Det er også brukt meir pengar enn budsjettert på oppussing av kyrkjekontoret som trengte eit løft. Den høge prisstigninga har også vore ein drivande faktor.

Det er framforhandla ein ny rammeavtale mellom soknet og kommunen for 2024–2027 som er betre tilpassa kostnadsnivået, og som også tek høgde for pris- og lønsveksten og dei store svingingane i pensjonspremiene vi har sett dei siste åra.

Meirforbruket frå 2023 må dekkjast inn i 2024. Det vil legge stort press på budsjettet i 2024, og dekking av meirforbruket må innarbeidast i størst mogleg grad i eit revidert budsjett for 2024. Det er også nokre midlar frå disposisjonsfond som kan brukast til dekking av meirforbruket, dersom ein ikkje kjem heilt i mål gjennom budsjettåret 2024, men disposisjonsfond har blitt tappa mykje dei siste åra.

## Oversikt kollekt, gåver og innsamlingar 2019 - 2023

	2019	2020	2021	2022	2023
Offer / kollekt i kyrkja	412 979	273 337	239 497	345 831	380 587
av dette - offer / kollekt til eiga verksemd	240 496	112 926	102 555	156 493	195 717
<i>av dette - offer til andre</i>	<i>172 483</i>	<i>160 411</i>	<i>136 942</i>	<i>189 338*</i>	<i>184 870*</i>
<i>Gjevarteneste Ulstein nye kyrkje</i>	<i>700 650</i>	<i>557 000</i>	<i>622 500</i>	<i>621 297</i>	<i>463 542</i>
Tilskot / gåver frå andre	50 770	16 500	43 500	42 189	58 400
Minnegåver	19 146	0	0	18 360	0
Fasteaksjonen - samla sum for innsamling	113 184	102 728	87 061	161 090**	143 495**
<b>Kollekt, gåver og innsamlingar totalt</b>	<b>1 311 729</b>	<b>836 639</b>	<b>994 564</b>	<b>1 188 767</b>	<b>991 024</b>

\* utan innsamling / kollekt fasteaksjon


\*\* kjelde: Kirkens nødhjelp (inkluderer også kollekt og all anna lokal innsamling til fasteaksjon)

## Hovudtal frå årsrekneskapen i Ulstein sokn 2023

Inntekter	Rekneskap 2023	Revidert budsjett 2023	Budsjett 2023	Rekneskap 2022
1 Brukarbetaling, sal, avgifter og leigeinntekter	1 143 725	1 078 150	1 078 150	771 826
2 Sal av driftsmidlar/fast eigedom	0	0	0	0
3 Refusjonar/overføringar	3 916 963	3 938 242	3 938 242	3 999 999
4 Kalk. inntekt ved komm. t.j.ytingsavtale	776 376	0	0	258 000
5 Statlige tilskot	0	0	0	0
6 Tilskot fa rettssubjektet Den norske kyrkja	1 587 299	1 460 000	1 460 000	1 577 800
7 Rammeoverføring/tilskot frå eiga-kommune	5 645 955	5 326 200	5 326 200	5 534 768
8 Tilskot frå soknet sine organ	0	0	0	0
9 Andre tilskot, gåver, innsamla midlar	967 793	570 500	570 500	1 112 230
<b>10 Sum driftsinntekter</b>	<b>14 038 111</b>	<b>12 373 092</b>	<b>12 373 092</b>	<b>13 254 623</b>
<b>Utgifter</b>				
11 Løn og sosiale utgifter	6 902 576	6 413 534	6 413 534	5 502 875
12 Kjøp av varer og tenester	2 142 429	2 142 429	1 818 692	2 069 037
13 Refusjonar/overføringar	4 247 295	3 821 916	3 821 916	4 064 814
14 Kalk. utg. ved komm. t.j.ytingsavtale	776 376	0	0	258 000
15 Tilskot og gåver	267 167	404 100	404 100	278 729
<b>16 Sum driftsutgifter:</b>	<b>14 335 842</b>	<b>12 458 242</b>	<b>12 458 242</b>	<b>12 173 454</b>
<b>17 Brutto driftsresultat:</b>	<b>-297 731</b>	<b>-85 150</b>	<b>-85 150</b>	<b>1 081 169</b>
18 Renteinntekter og utbytte	406 730	60 000	60 000	207 843
19 Mottekne avdrag på utlån	0	0	0	0
20 Renteutgifter og låneomkostn.	36 471	49 000	49 000	156 888
21 Avdrag på lån	97 927	134 400	134 400	510 075
22 Utlån, kjøp av aksjar, andelar o.l.	0	25 000	25 000	0

Utgifter	Rekneskap 2023	Revidert budsjett 2023	Budsjett 2023	Rekneskap 2022
23 Netto finansinntekter/-utgifter	272 332	-148 400	-148 400	-459 121
24 Avskrivningar	525 461	0	0	525 358
25 Motpost avskrivningar	525 461	0	0	525 358
<b>26 Netto driftsresultat</b>	<b>-25 399</b>	<b>-233 550</b>	<b>-233 550</b>	<b>622 048</b>
Interne finansieringstransaksjonar:				
27 Bruk av udisponert frå tidl. år (mindreforbruk)	0	0	0	0
28 Bruk av disposisjonsfond	520 675	520 675	165 000	205 051
29 Bruk av bundne fond	187 031	68 550	68 550	80 380
<b>30 Sum bruk av avsetningar</b>	<b>707 706</b>	<b>589 225</b>	<b>233 550</b>	<b>285 431</b>
31 Avsett til dekning frå tidlegare år (underskudd)	0	330 303	0	0
32 Avsett til disposisjonsfond	0	0	0	0
33 Avsett til bundne fond	842 598	0	0	907 480
34 Overført til investeringsregnskapet	0	25 372	0	0
<b>35 Sum avsetningar</b>	<b>842 598</b>	<b>355 675</b>	<b>0</b>	<b>907 480</b>
<b>36 MEIRFORBRUK (-) / MINDRE-FORBRUK (+)</b>	<b>-160 291</b>	<b>0</b>	<b>0</b>	<b>0</b>

### Gåver og kollekt til Ulstein sokn



## Balanserekneskap, Ulstein sokn 2023

	Rekneskap 2023	Rekneskap 2022
<b>EIGEDELAR</b>		
<b>A) Anleggsmidler</b>		
Faste eigedommar og anlegg	17 929 066	18 335 399
Utstyr, maskinar og transportmiddel	910 574	1 029 702
Utlån	0	0
Aksjar og andelar	375 420	348 364
<b>B - Omløpsmidlar</b>		
<b>C - SUM EIGEDELAR:</b>	<b>29 764 258</b>	<b>29 972 240</b>
<b>EIGENKAPITAL OG GJELD:</b>		
<b>D - Eigenkapital</b>		
Disposisjonsfond	1 448 431	1 969 106
Bundne driftsfond	8 018 004	7 362 437
Ubundne investeringsfond	53 500	53 500
Bundne investeringsfond	0	0
Regnskapsmessig mindreforbruk	0	0
Regnskapsmessig meirforbruk	-490 594	-330 303
Udisponert i investeringsregnskapet	0	0
Udekka i investeringsregnskapet	-263 234	-25 372
Kapitalkonto	18 384 664	18 574 336
<b>GJELD</b>		
<b>E - Langsiktig gjeld</b>		
Andre lån	934 734	923 449
<b>F - Kortsiktig gjeld</b>		
Anna kortsiktig gjeld	1 678 753	1 445 087
<b>G - SUM EIGENKAPITAL OG GJELD:</b>	<b>29 764 258</b>	<b>29 972 240</b>
Memoriakonti		
Ubrukte lånemidler	104 339	6 000
Motkonto for memoriakontiene	-104 339	-6 000

# INFORMASJON OG KONTAKT

## Opn kyrkje, kyrkja på senteret og opne kontor

Ulstein kyrkje er opn for besøk, tysdag til fredag mellom kl 08.00 og 16.00.

Kyrkja på senteret har opne kvar onsdag kl 11.00 – 15.00 og har blitt eit viktig uformelt møtepunkt.

Kyrkjekontoret er opne tysdag til fredag kl 10.00-14.00 for vitjande. Trass i auka bruk av digital kommunikasjon er den personlege kontakten med tilsette gjennom eit opne kontor viktig.

## Publisering

Å ha gode kanalar for å nå ut til mange er viktig for ei folkekyrkje med 6600 medlemmar. Med kyrkjesida i Vikebladet Vestposten når vi fram til mange husstandar gjennom papiravisa. Kyrkjesida kjem på trykk annankvar veke i samarbeid med Hareid kyrkje, slik at vi veke for veke får informere om aktivitetane våre. Glastavla ved inngongen til kyrkjetomta syner aktuelle plakatar, og ein finn brosjyremateriell både i våpenhuset og ved turistinformasjonen på Ulstein Arena.

Heimesida til Ulstein sokn er ei viktig kjelde for informasjon om kyrkjelege handlingar, gudstenesteliv og kyrkjelydsarbeid. Mange melder til dåp, konfirmasjonsundervisning eller trusopplæringstiltak her.

For promotering av arrangement nyttar vi Facebook som kanal, noko som er med på å skape identiteten til kyrkjelyden. Til streaming av arrangement nyttar vi både YouTube og Facebook. Alle gudstenester vert overført via ei lukka linje til TV-apparat i institusjonane.

## Kontakt med Ulstein kommune

Soknet har eit godt samarbeid med Ulstein kommune. Ordføraren er kommunal representant i Ulstein kyrkjelege fellesråd, og gir oss ei viktig kontakt inn i dei politiske organa. Det er eit godt samarbeidsklima med kommuneadministrasjonen, og gjennom tenesteytingsavtalen får soknet levert rekneskapstenester, administrering av løn for tilsette og praktiske tenester knytt til arbeid på kyrkjegarden.

## Kontakt med prosten i Søre Sunnmøre

Prosten leier prestetenesta i prostiet og er næraste overordna for prestane. Prosten initieterer ein årleg prostidag for alle tilsette i prostiet, og deltek elles på årlege samlingar med stab og sokneråd.

## Kontakt med Møre Bispedømeråd

Ulstein sokn får kompetansetilskot til kateketstillinga og til diakonstillinga. Tilskotet utgjer 50% av lønskostnadane til desse stillingane. Ulstein sokn mottok også årleg tilskot til trusopplæring. Dette arbeidet skjer etter ein godkjend plan og er utvida sidan soknet i 2014 mottok tilskotet fyrste gong.



I januar fekk nokre i staben høve til å delta i ei virtuell vandring gjennom Ulstein nye kyrkje. Sveinar Kleive (i grønt) var pådrivar i lag med elevane frå Ulstein Ungdomsskule. Elevane hadde framarbeidd prosjektet på Skaparhuset basert på teikningar frå Snøhetta. Dermed vart Ulstein nye kyrkje bygd i 2023 -men "berre" i dataspel "Roblox".

Her fekk mellom anna soknepresten og kateketen på seg VR-briller før dei kunne vandre rundt i det digitale kyrkjeromet.



# SLUTTORD

---

Når du les dette, så er du truleg komen til slutten av årsmelding 2023 for Ulstein sokn.

Ei årsmelding som gjev eit godt innblikk i breidda av det arbeidet som vert drive i regi av Ulstein sokn og dei organisasjonane vi samarbeider med.

Den fortel om hendingar og aktivitetar, har statistikk som viser omfang og

endringar frå år til år, skildrar område vi har satsa på,

men den fortel og om der vi skulle ønskt vi var komne lenger.

Den fortel om oss som medlemmer og kyrkjelyd,

men den fortel og om det samfunnsoppdraget vi er ein del av.

## **Solskinshistoriene.**

Denne delen var ny i årsmeldinga for i fjor. Det synest vi var så vellukka at den er med vidare i år og. Kanskje og litt utvida. Les og sjå på bileta.

Aktivitetar og personar som på ulikt vis er knytt til oss

og det som skjer i vår kyrkjelyd.

## **Avtale mellom Ulstein sokn og Ulstein kommune**

Vi har over fleire år hatt ein avtale som regulerer samarbeidet og samspelet mellom sokn/fellesråd og kommune. Den er no fornya og gjeld for perioden 2024-2027.

Den sikrar stabile og langsiktige rammevilkår. På økonomisida er det gjort to

viktige endringar i høve til førre avtale. Årleg justering av

ramme og sikring mot urimeleg høge pensjonskostnader.

## **Er vi ferdige med corona/kovidpandemien?**

Pandemien og pålegga som vi fekk som kyrkjelyd, innebar ei deltaking som var langt under det vi var vane med. Det kan vi lese ut av statistikkavsnittet.

Det kan sjå ut som vi no er i ferd med å nærme oss tala frå tida før pandemien, men ikkje heilt. Gode og relevante aktivitetar og møteplassar utfordrar oss som kyrkje.

Tilsette, frivillege, råd og rådsorgan, men og oss alle som medlemmer i ein kyrkjelyd.

## **Ulstein nye kyrkje**

Det er mange som etterlyser nye og betre lokalitetar for det omfattande og flotte arbeidet som vert drive i regi av sokn og samarbeidande organisasjonar.

Det stadfestar og den nye innbyggarundersøkinga som Ulstein kommune har gjennomført.

## **Nytt sokne- og fellesråd**

Det var val av nytt sokneråd og fellesråd hausten 2023. Og slik eg så langt har opplevd det nye rådet, så er det eit råd med mange og gode kvalitetar.

Ei fin blanding av kvinner og menn i "alle» aldrar", med brei erfaring, bakgrunn og kompetanse.

Takk til alle for di deltaking, di omsorg, omtanke og forbøn!

*Odd Arne Vikebakk  
Leiar sokneråd og fellesråd*



**ULSTEIN KYRKJE**  
*Saman på ferda*